

國

朝

列

卿

紀

戶部尚書行實

侶鍾字大器山東兗州府鄆城縣人天順六年以

鄉試成化丙戌舉進士五年授浙江道監察御史都御史黎陽
王越特薦御史四人可大用四人者吏部尚書屠公瀟工部尚
書楊公守隨僉都御史王公濬及鍾也十五年陞大理寺右寺
丞十六年轉左寺丞十八年進本寺右少卿明年陞右副都御
史巡撫保定等府兼提督紫荆等關二十一年陞刑部右侍郎
丙午丁母憂還督運總兵總督王信遇諸漕河以其簡已乃以
事中之謫知雲南曲靖軍民府弘治二年服闋改徽州府其年

冬陞大理寺左少卿三年陞左副都御史巡撫蘇松等府六年陞戶部右侍郎督倉場尋還理部事八年改吏部右侍郎轉左侍郎十一年陞右都御史十二年陞戶部尚書在部四年屢以師出給餉勞 賜綵幣白金嘗以疾在告命醫診視中官禮問於家 賜內醞諸珍物尋請老溫詔慰留不允十七年再以疾請乃允之仍命馳驛還鍾白晳長身不妄語笑剛毅諒直夙夜惟勤初爲御史時辛卯奉 勅巡兩淮鹽中實用事者道淮勢張甚獨抗不與見名頓起其按應天等府清揚濁激烈然當人心又同巡撫大臣賑濟民不殍死甲午按浙江亦然浙巨藩專達自逸日取詞訟閱之薄夜分乃寢凡行憲葺榭舊

以似也者悉封不視有布政以賄聞郡暴於衆或弔疾以去
致仕兵部項尚書忠嘗爲鄉人誣奏禍臣測奉命與中貴人
之白其寃項宗獲全海鹽海岸崩工久不就令所司以荆器實
磚石先塞旁流工乃成夏旱不雨乃禱雨三日鄉宦夏大理時
正輩作詩頌其功其監秋試場黜舉子之私以賄請者而不暴
其名曰母以一人玷我賓興盛典黎陽公旣重之比還朝乃悉
以奏牘委之論列益無避忌巡撫遼東都御史馬公文升亦用
事者所惡風鍾劾之鍾不可由是恨益深無何被廷杖或以爲
用事者所譖鍾執益堅卒不屈其在大理值癸卯大同有虜警
命撫安真保等府民安乃還其巡撫保定却守關者餽令請禁木

以固邊陲保障河間海濱淤地舊爲豪右占種者悉還之民其在江南日以擇廉吏禁侵漁爲阜財要務屬吏之疆有力者亦被笞掠歲值澇條寬恤事請允之旣而澇復甚又條奏九事戶部格不行時特遣廷臣齎內帑賑杭嘉湖三府水災因上疏理前奏且言蘇松嘉興杭湖五府均之赤子也賦稅之出蘇松重於三府水災所傷三府輕於蘇松今三府乃蒙賑恤而蘇松之民何獨不一蒙恤念乎又奏設高淳縣以分治溧水民便焉其在吏部進退無涉一視與論卽有薦未嘗令人知以爲恩其在都察院詳定條例夙夜惟勤獄獄俱從仁恕在戶部振刷行年事無滯留嘗以四方多災報乃疏重京儲備

自公應度邊餉清鹽法均禁例備芻料節香蠟戒拾越處
恤災傷十二事以聞於時政多裨益焉又以九門內臣職譏
不可令干國課疏累上必得請乃已時 國用不足上疏言冗
食太多宜汰減內降官吏光祿寺供應太繁宜減內侍及畫工
番僧酒饌天下有司存留糧稅歲不充用宜白郡王以下量爲
裁處太倉銀不宜收入內庫內庫所蓄金幣不宜修齋造像及
充私賞城門中使不宜干預國課 朝廷難之久不報及貴戚
有丐長蘆兩淮鹽引者旣得 旨又執奏乞寢成命以杜將來
及見報罷漸多乃復上言其略曰臣竊言二三事皆爲國計未
蒙批答伏乞 宸斷凡臣意事干貴近者亦乞施行以通下情

上是之常創板庫以儲羨餘諸司由是有所稽覈比去積多至若
千千萬然居官不能檢其子怨者彌衆而謗言興矣鍾居家孝
友晚雖謝客日以書史自娛至語及時事輒鬱鬱不樂屬纊時
子以後事請不答但云天下事大可憂而已壽七十有二

琬琰錄曰鍾爲御史按浙江民隱官邪無不洞悉嘗曰小民之
不得安於田里者有司之虐政致之也彼賣菜傭何爲哉故其
彰瘡所及賊吏望風解綬而民間晏然

秦紘字世纓山東兗州府單縣人性剛毅不與世苟合景泰辛
未成進士擢南京山西道御史侃侃奉職綽有風裁天順元
以事忤左都御史軒公輒軒疏紘不職降北黃驛丞

知其賢爲知雄縣天順八年又忤中官下獄調陝西平谷知
廉能有威修建縣治學舍民自不擾成化元年陞葭州知州
平訟理二年調秦州知州廉明剛果民多愛慕五年陞鞏昌知
府持身公正不敢干以私又禁官府賈賣豪猾無緣爲奸久之
調西安府益勵精勤庭無宿案賦役屢數萬心計不爽錙銖雅
性儉素孤介無毫費及於民有古循良風十三年進陝西右叅
政十五年陞左布政使在關中最久民情益練凡典司出入雖
寸牒禽豢皆手書日閱奸黠凜然知戒又平徭役完通負至於
聲色謙遊之樂泊然不泊其心識者謂然起西安歷藩司與余
肅敏同聲望又相當至今陝西並祀遺愛祠十六年陝西缺撫

臣從人心特陞都察院右僉都御史巡撫時秦府旗校肆橫民苦之紘悉擒治不少貸秦王不能堪奏其欺滅親王 憲宗震怒逮下錦衣獄命內臣尚亨籍其家止得黃絹一疋故衣數事亨回奏紘貧狀 上親閱其貲嘉歎良久詔釋其繫且錫鈔萬貫以旌其廉調撫河南既抵任巨錨汪直亦以事至汪時孺弄威福聲勢烜赫他巡撫官率相禮以見紘獨與抗禮略不爲屈汪亦知重之不爲較紘乃密疏汪多帶旗校騷擾地方後汪回京 上問各省撫臣賢否汪獨稱其廉能 上以紘疏示汪汪叩首伏罪稱其賢不置 上釋之未幾改撫宣府時虜患方劇且夕講求邊務謂禦虜莫如自治乃謹斥壕明烽火葺營壘

以待之邊境恃以無虞二十年改左僉都御史理院事風采益峻御史姜紘輩不職劾之皆謫云二十年陞戶部右侍郎未幾數月以忤時貴降廣西左叅政弘治元年太宰三原王端毅公素重其剛正特起左副都御史總督漕運益侃侃自樹風采巖然會御史姜洪巡按湖廣令布政司抄案轉行湖廣稅糧事紘奏洪犯分刑科給事陳瑄等駁論紘恕已不明十三道御史論紘剛愎 上以事干大體俱罰俸又令禮部會議調洪知縣說者謂朝廷處置洪等難過而紘所執奏亦關於憲體云未幾兩廣缺總制進右都御史總制兩廣兼理巡撫先是後山諸賊為患有年紘調兵委湖廣按察使陶魯討平之時總兵官安遠侯

柳景貪而不法乃具列其狀劾之逮下刑部獄追贓鉅萬褫其
爵景挾戚畹干內降冀滅其贓且撫他事誣紘以圖報復紘亦
被逮赴獄坐免臺諫交章論救王端毅又極言其當大用五年
起爲南京戶部尚書持身孤特御下以嚴不入義外一錢及致
仕行李蕭然歸家閉門不理外事臺諫交薦起之南京守備魏
國徐公備特疏紘可當邊關重寄十四年北虜犯固安等處起
戶部尚書兼左副都御史總制陝西固安等處軍務十五年特
命昭王威寧例仍總制陝西延綏寧夏軍務巡撫而下咸聽約
束遂爲定制至則奏陞開城縣爲固原州明年冬甘涼諸路備
禦官軍以資乏乞休息武安侯鄭英以爲虜酋在套不可紘曰

時草枯馬瘠虜必不至已而果不至所省芻餉甚多嘗謂守邊之策惟戰與守乃推演古法造兵車置火器修豫望石峽口築峯臺三城於金佛峽海子口七堡甃石爲垣累鐵爲門及築下馬房邊城三百餘里皆以絕虜道衛民居焉是年夏又命三邊與其腹裏修城堡關隘一萬四千一百九處剷崖設險三千七百餘里自是北虜不敢窺伺時固原城市荒稀民貧乃拓其外城奏移批驗鹽所於此由是商賈流通公私兩便又創修孔廟廣學舍詩書之化人才彬彬相繼出矣在任三年邊功孔多既去軍民不忍忘爲立祠祀焉至今言總制經略之功必以紱爲第一十七年加太子少保本年召改戶部尚書理部事未任乞

致仕十八年卒於家贈少保謚襄毅紘平生剛毅廉介官四十餘年至大司徒所居僅蔽風雨妻孥菜羹麥飯不改其舊及卒家無餘貲未幾子孫有貧乏不能存者其操節始終一致爲時名臣云

韓文字貫道其先爲相人蓋魏公之裔也譜稱七世祖諱永值金兵之亂去相徙居山西之洪洞於是爲洪洞人文將生日父夢紫衣人抱送文潞公與之因名文幼負奇質才思溢發旣長從太史襄陵邢公遜之遊學益淵博領成化乙酉鄉薦登丙戌進士初拜兵科給事中持節封韓府高平諸饋遺悉卻不受

都御史王越總邊事邀功啓釁率同官列其罪狀又論薦

許家宰李公秉司馬王公竑可大用語涉官禁 純皇嘗嘗

逮至 文華殿拷掠幾死陝西紀功郎中張瑾疏總兵等官私

降用 上命往覆之文以情之輕重其實還 奏入服其公乙

未陞右給事中以直言爲當道所忌戊戌滿考始陞湖廣右叅
議提督大獄太和宮分守荆南談者以用非其地爲負屈而文

處之裕如勤於其職分守中官與其下皆嚴憚歛戢境內賴之

又稽覈諸官羨銀易穀創庾以爲荒備越三年用巡撫吳公誠

薦改理司事會九溪酋長白嘴鼻與隣境爭地相攻撫按屬文

往視其爭遂息歷七年以右轉左聞者駭然未幾以外艱歸弘

治戊申終喪赴部家宰王端毅公知其久滯諒山東左叅政亦

南之俗乘旱輒聚發人墓暴其尸謂之行戮文曰是甚於寇
之暴矣亟下令禁之越二年庚戌用公之薦超陞雲南
左布政使先是土官襲代旁支恃強相仇奪土吏濫用
考者例不赴京復於境內轉相叅補至文始立法釐
正之越三年癸丑陞都察院右副都御史巡撫湖廣地方兼贊
理軍務武昌諸郡歲歉疏乞蠲逋以蘇民乙卯改撫河南值
懷孟以北旱饑令所司發銀賑貧勸蠲輸騰致雨歲乃大熟
丙辰轉戶部右侍郎丁巳以內艱歸庚申終喪改吏部明年轉
左銓綜平允士論翕然歸之癸亥陞南京兵部尚書叅贊機務
是會守備中官議事多遜避不發一言或探其意嚮以為可

否文曰事之可否有理與法吾惟以無私處之可拱默爲遊觀
計耶遇事輒冒言商榷聞者無不敬服時值水旱相仍民饑
死者相繼乃移文戶部欲預支三月糧以平糶價所司以未得
命爲辭文曰救荒如拯焚民命在旦夕能忍死以待卽得罪吾
請以身任之竟發米十六萬石民賴以安甲子改戶部尚書於
是 敬皇帝勵精圖治文亦激遭遇早朝畢嘗被召直至 榻
前論以鹽法廢弛邊防 九屬文稽考舊制及諸沮壞之弊文
疏陳七事一曰革鹽中 鹽之弊二曰革興販私鹽之弊三曰
革賤賣官鹽之弊四曰 補殘鹽之弊五曰革夾帶殘鹽之
弊六曰革越境賣 弊七曰革運司廢弛之弊指摘剴切甚

蒙嘉納於是數十年積弊無遺公私告便時宣大聲息甚急需
索供億復值大喪相繼并內外及各王府諸邊賞賜費用不
貲悉心經畫緩急以濟太監苗達等徂虜無效日費動逾千金
力爲舉劾乃銜甚乞文督餉以圖中傷遂寢追究羽流幻術計
還節盜帑物抑戚畹中貴占奪和買民田及舉正窩占引鹽乞
討織造皆事干權倖怨謗叢集人爲危之文裕如也 武皇登
極太監劉瑾等依憑春宮宿愛蒙蔽 聖聰蠱惑百出每以夜
爲日荒湛無度因而挾內令外機柄竊持威福倒置虐燄橫空
縉紳凜凜率日顧以避初承運庫內官差往南京織造照弘治
年間奏討長蘆官鹽載至南京變賣銀買辦織造文與司官李

夢陽王崇文徐廷用議曰今新政之初決不可准鹽課織造於是再執奏 上召內閣問之劉健對以內官裝載官鹽夾帶和鹽沿路害人 上曰內官固害人文官也有不好的璫等益橫文追痛 孝皇深以 宗社爲憂首倡府部科道等官伏闕抗章暴露其狀卽繼以泣乞置諸法 武皇覺悟毅欲附從奸邪洩謀營救有地輒報中止用是愈無忌手握口銜恣其播弄塗炭乃極尋搜文細故捏寫旨意降級致仕給事中徐昂論救謂文寡慾清心數十年無仇儷之樂矯枉過直以其子爲刑曹之官比因忠憤所激不應停勒徐坐除名文緣此再降級閑住復將子高唐州知州士聰刑部主事士奇各爲民令遷卒伺察於

途文乘一騾宿野店而歸邏卒無所得仍假失落簿籍復捏告
差官校械繫至京鞫錦衣獄會早朝有投匿名文書於丹
堦銖瑾罪惡中官必欲害文報復急情瑾怒甚監禁數月無隙
可入該司其實上請仍被捏旨罰米一千石大同上納陸續更
罰米二千石稱貸以給決午瑾謀復原職世廟登極臺諫交
薦起用賜璽書褒嘉尋以守正被害加太子太保令有司存
問復賜諡有曰此因權奸之竊柄痛爲朝政之紛更乃能守
正不阿以忠自誓倡危言而叩闕屹乎山岳之難搖甘奇禍以
忘家凜爾冰霜之不變天下仰其風采神明相其壽康起文
博於九泉之餘人心攸屬繼韓魏公於百代之後家慶彌彰每

宣讀畢文俯伏感泣痛惟老朽不圖復見今日捐館訂闋上
悼念不已再賜誥贈特進光祿大夫太傅謚忠定仍遣官
祭營葬文以孤忠報主甘受奇禍一時縉紳莫不爲之扼腕
而彼惡直醜正之徒則或傍觀竊笑以爲不智其甚者忿其異
已且從而下石焉其亦可慨也已然貞松勁栢挺立於歲寒之
後完名盛福卒兼而有之非其所立無愧於天無負於國家曷
克以臻茲耶國史稱其爲人清修耿介識量宏遠居常抑抑至
臨大事輒毅然不可屈撓云

李夢陽秘錄云武宗初卽位青宮舊閣等日導上狗馬鷹
兔舞唱角觥漸棄萬幾時號八虎而段敏黃偉雖舊閣以端慤

斥不信用會段坐病免死於是戶部尚書韓文每朝退對屬史
言輒泣淚數行下以闕故郎中李夢陽聞說之曰公大臣也義
共國休戚徒泣何益韓公曰奈何曰此諫臣有章入交論諸闕
下之閣矣夫三老者顧命臣也開持諫官章甚方公誠及此時
率諸大臣殊死爭閣老以諸大臣爭也持必更力力易爲辭事
或可濟也韓公於是捋鬚昂肩毅然改容曰善卽事弗濟吾年
足死矣不死不足以報國翼日早韓公密叩三老許之而倡諸
大臣諸大臣又無不踴躍喜者韓公乃大喜退而召夢陽令具
草草具韓公讀而芟之曰是不可文文 上弗省也不可多
也而王岳者亦青宮闕也剛厲而無阿頗亦惡其闕儕

初閣議持諫官章不肯下諸闈者業窘相對涕泣會諸大臣疏
又入於是 上遣司禮者八人齊詣閣議一日而遣者三而四
議持卒不肯下而岳者八人中也顧獨曰閣議是明日忽有
旨召諸大臣諸大臣者蓋人人惴也既入左掖行吏部尚書許進
首咎韓公曰公疏言何韓公於是故曳履徐徐行而使吏部侍
郎王鰲趨詣閣探動靜閣老劉健語鰲曰事已七八分濟矣諸
公第持莫輕下至左順門闈首李榮于諸大臣疏曰有 旨問
諸先生諸先生言良是無非愛君憂國者第奴儕事 上久不
忍卽置之法耳幸少寬之 上自處耳衆震懼莫敢出一語答
李榮面韓公曰此舉本出自公公云何韓公曰今海內民窮盜

起水旱頻仍天變日增文等備員卿佐靡所匡救而 上始踐
祚輒棄萬幾遊宴無度狎匿羣小文等何得無言韓公言雖端
而氣不勁又鮮中肯綮於是李榮哂曰兩疏備矣 上非不知
今意第欲寬之耳諸公遂悻然而退蓋是日諸閣者業窹自求
安置南京而閣議猶持不從諸公乃竟爾爾退惟王鏊前仍謂
榮曰設 上不處如何李榮曰榮頸有鐵裏之邪而敢壞國事
榮入而事變矣是夜立召劉瑾入司禮而收王岳范榮詔竄南
京尋殺二人於途已又連斥劉謝二老顧獨懇留李而韓公輩
詢詢咸拔茅散矣變之起大抵莫可詳而李榮則曰諸大臣退
而瑾儕繞 上前跪伏哭痛首觸地曰微 上恩奴儕碌餒狗

矣 上爲之動而瑾輩輒進曰害奴儕者岳也 上曰何也曰
岳前掌東廠也謂諫官曰先生有言第言而閣議時岳又獨是
閣議此其情何也夫 上狗馬鷹兔岳嘗貢獻之否 上心所
明也今獨咎奴儕而益復伏地哭痛 上於是怒而收王岳瑾
又曰夫狗馬鷹兔何損於萬幾今左班官敢譁而無忌者司禮
監無人也有則惟 上所欲而人不敢言矣 上於是詔瑾入
司禮監此其說亦近第難盡信耳又聞閣議時健嘗推案哭謝
亦覺苦悶休獨李未開口得懇留云

尚書張潤云公風骨玉屹舉止凝重雍粹若天成加以奮勵充
養動爲遠大作程自給舍迄藩岳部院四十餘年歷事 二朝

國朝文獻通考卷之二十三
受知一列聖夙夜圖報黽勉以忠愛為主晚斥姦權慷慨任重
直聲壯節丕振中外晦菴劉閣老嘗語人口國家養士百四十
五年當其時只養得箇韓貫道者

雜記云公年五十時喪其閨夫人子輩數以再娶并納妾爲勸
言及輒怒云我年已至此復何爲哉卒獨處一室雖使婢亦不
容入遇冬寒命小孫溫足教其念書作對句雖處極貴自奉甚
薄清心寡慾如此所以剛持不屈卒能與東山齊名也

大學士楊一清云公平生政跡甚多而晚年抗疏誅瑾一節尤
卓犖奇偉

又云公素少疾家居好吟咏垂老猶能作楷行細字家居行義

可述者甚多鄉里化之惟恐惡聲入於其耳 國家文臣謚忠
定者惟少師蹇公一人蹇厚重博大爲當代名臣公德量槩與
之同而得值行志則未若蹇公之顯且久也至論其嫉惡之嚴
任事之勇蹇公之在當時恐亦無能勝之

尚書林俊云質菴諫垣時不立異於物無所於爭而論事侃侃
籌諸心體量諸事爲理當否物勢便戾政因革所宜蓋有人不
能言獨言之者矣歷大藩以至中丞少宰司馬司徒廓大遠水
莊簡而凝重休休然其容抑抑貶損親賢而下善以詢咨遠猷
根求彝憲默化潛運畏乎其無形而天下陰受其賜蓋有人不
能行獨行之者矣當其時與司馬劉公東山都憲崇公公菴相

弘治大君子 吏部請謚有曰愚同審子而竟保其身老似武公而不弛於學

顧佐字良弼直隸鳳陽府臨淮縣人登成化己丑進士授刑部主事歷員外郎郎中特錦衣衛都指揮牛循嘗怙勢殺人鎮守宣府太監顧雄分守紫州關監丞鍾欽事多不法佐按致其罪識者謂其有守成化十九年出知河間府府畿甸也貴戚莊田基峙境內聞佐至皆戒其下不敢乘勢欄轢先是定徭役悉委吏胥多寡高下一出其手驛當孔道老奸宿蠹蟠結其中乃會校出入據籍履晦定爲程式其弊遂絕郡有瑞蓮秀麥之謠政聲流聞二十三年進四川按察副使整飭建昌兵備越雋山崩

地震民駭蕩析佐憊心力撫循增修屯堡哨戍民以安堵弘治三年徵拜大理寺右少卿丁憂七年補左八年進右僉都御史巡撫山西提督鴈門諸關九年改南京都察院提督巡江十一年改都察院十二年進右副都御史十六年陞戶部右侍郎十七年六月北虜小王子求貢甚急兵部擬差佐往大同宣府整理糧草上召大學士劉健等至煖閣袖出所擬指佐名曰是嘗差幹事力量頗弱恐不能了此劉健等對曰戶部尚書秦紘行取尚未至左侍郎王儼可用但見署印故臣等擬差右侍郎惟皇上裁擇上曰王儼固好但掌印須留管家當顧佐亦不必動凡有事二人商議乃得停當各衙門官先生輩知之可

推有才者不必拘定戶部十八年陝西三邊告饑 孝宗命兼
僉都御史往蒞之 召至御榻前詢問憊勞賜以白金文綺有
如朕親行之語且顧近侍紀之比至條陳便宜多方區畫始有
三年之積正德初戶部尚書韓文率百官伏闕上疏得罪去佐
實代其位旋有玉帶麒麟服之賜時逆瑾盜政威權日熾士夫
見者多爲諛詞諂貌佐自若也瑾性極貪酷而外假仁義大監
王琇於御馬監建新宅誘 上居之因奏令攬納戶數人專一
包納京倉糧草所得利進於內琇自爲旨送戶部出榜佐等白
於劉瑾谷大用瑾大怒同谷大用直至 御前言安有 天子
令人包納錢糧之理 上以爲不知瑾遂枷其攬納戶於戶部

門外命壁其枷不得屈伸卽日死然亦不能加誘罪瑾諷諸司各進羨餘以入私藏佐曰吾部無羨餘者壁銜之未發也後瑾因戶部奏送各邊年例銀兩瑾以爲 祖宗朝無此例命佐查天順年以前年例銀數佐以天順前無前銀例回報瑾大怒曰此戶部官通巡撫邊方都御史共盜內帑銀兩之明驗也悉追問致罪革罷送銀之例邊儲至是缺甚蓋自成化八年開設榆林衛余子俊巡撫增置城砦陝西民供不繼奏送江南折銀以補不足然初亦以南京折銀例每一石折銀二錢五分放支軍士其後大同等邊缺之亦皆送銀補足數皆不多未嘗以出計送者弘治初戶部尚書葉淇與內閣徐溥同年最厚淇淮安

人鹽商皆淇親識因與淇言商人赴邊納糧價少而有遠涉之虞在運司納銀價多而得易辦之便淇遂奏准兩淮運司鹽課於運司開中納銀解戶部送太倉銀庫收貯分送各邊鹽價銀積至一百餘萬兩人以爲利而不知壞舊法也蓋洪武永樂以來天下鹽課俱開中各邊上納本色米豆商人欲求鹽利預於近邊轉運本色以待開中故邊方粟豆無甚貴之時今廢商人赴邊報中之法雖曰得價多而近邊米豆無人買運價遂騰湧正德五年侍郎叢蘭整理陝西邊儲遂令百姓每石徵銀二兩五錢准米一石蓋六部政本少有差錯貽弊如此使佐當劉瑾查問之時答曰昔鹽課在各邊上納故無年例銀之送後改鹽

課納銀解京故不得不分送各邊如此瑾必不怒而反正鹽法必不受其禍矣而緣隴回報使士民受害識者短之瑾憾韓公文不已借撫卹方無所得會部有故問逆弗得瑾欲以爲韓罪嫉佐上其事皆不行國分俸三月佐曰可以去矣遂引疾乞歸疏再上允即行遂令逆人劾其過無得意不嫌時命官按三邊儲蓄有紅鷹則以爲罪佐時去邊三年餘矣 詔罰輸米八百石於邊逢水漲則以救易米於治中有旨准行又以爲佐罪罰輸三百石月有缺失又以爲佐罪罰輸百五十石佐素貧殫家資以贖不足稱貧益之人皆寬之無愆色正德丙子十一月七日卒於家年七十四佐既溫氣和內守堅定立朝四十餘年

當財利紛爭無所漸染權奸歛絕無所駁倚初壽寧張公發自河間佐爲河間守嘗有德焉比當路每論悅於佐佐謝之方其爲大理也或以爲壽寧之援也及壽寧有召朝士全集而佐獨不往時王瑞毅爲冢宰並稱之始知所自逆瑾伏法其事益明及計聞贈太子太保

大學士王鏊云士抱負所有患不得位以行得位矣患不逢時以抒其志若顧公奮自一經致位八座遭值權奸橫斥以去其蘊有不能盡施者耶然頓頓挫撼不沮不屈亦可自表見於世矣後世其有知之者乎其無知之者乎於乎傷哉

劉幾字用泰陝西西安府咸寧縣人成化辛丑進士授山西

沃縣知縣敷政平恕於民不擾久之陞戶部山西司主事弘治四年奉部檄督餉西陲五年丁父憂後起復進本部員外郎郎中歷知瑞州九江衡州三府俱尋常供職無善績十八年以逆瑾同鄉陞太僕寺少卿未逾年逆瑾竊政甘心鼠附改太常寺卿提督四夷館踰二月驟陞戶部右侍郎時逆瑾既構陷尚書韓文知邊方召商買納糧草情弊因戶部奏差給事中御史三年一次查盤回奏內有糧粗糶草浥爛者瑾稟旨遠繫巡撫都御史管糧郎中下獄旣而鎖扭差人押至所任地方加倍陪償凡商人納過糧草拖欠價銀皆沒官不給由是商賈困弊邊儲漸乏又因顧佐查天順前無送邊例銀遂止各邊送銀并禁商

人報納以致公私告竭尋遂佐去位進璣尚書璣巧宦固位不
敵正抹及瑾詢國初如何充足淺識者以爲國初屯田齊舉
故軍食自足后爲勢家所占以此軍不自給璣遂慨然齊舉屯
田分遣胡汝礪楊武周東顏順壽等往各邊丈量屯田以增出
地畝甚多迨完積逋者爲能否則罪之又命散銀於邊州縣百
姓買米陪脚耗運送邊倉交納奉行苛刻人不聊生僞增屯田
每數百餘頃悉令出租至正德五年近邊米豆無人買運差待
郎叢蘭整理陝西邊儲遂令百姓每石徵銀三兩五錢准米一
石璣甘心黨惡恬不省憂會真鐸之變逆瑾伏誅以黨奸罷黜
璣離知府逾年遂溢八座在戶部四年成憲盡變革坐視元氣

日損民窮盜起猶脫天網識者不能無遺憾云

楊一清字應寧雲南安寧州人湖廣岳州府巴陵縣籍成化壬辰進士累官右都御史總制陝西軍務正德五年逆瑾伏誅以國計重事一清有心計召爲戶部尚書尋加太子少保戶部自逆瑾竊政以來查盤禍作守臣不復儲積遷就了事延捱月日故邊儲一空一清行各邊巡撫將見在官銀多方招糴故公私稍備辛未年順天應天山東河南盜起一清上疏十一事曰裕民曰增軍曰定賞格曰宥脇從曰聯鄉保曰充賞賚曰嚴罰禁曰治退縮曰察蒙蔽曰禁奔功曰防奔突 上嘉納之復改入吏部歷內閣詳內閣

孫文字志同湖廣承天府鍾祥縣人自幼秀穎嗜學雖盛暑不輟成化辛丑第進士授南京兵部車駕司主事留務事簡每日散衙後諸僚輩各歸私第或出訪客或拉朋儕飲奕賦詩習以爲常交獨退處一室默坐觀書至晚方回或以爲言則曰對聖賢語不猶愈對賓客妻妾乎三原王端毅公時爲大司馬嘉其有志甚愛之弘治初三原起爲冢宰卽調吏部用以自輔歷稽勲文選司員外郎進驗封司郎中七年以憂去十年起復補稽勲司十六年調文選司郎中守法信度確然不撓遍三要司十有餘年益勵廉隅惟培植善類不忍其摧抑一切選授陞遷與倪文毅公酌酌地方遠近煩簡務當其才輿論胥服十四年陞

太常寺少卿提督四夷館正德元年陞光祿寺卿時逆瑾竊政
諸所作無益事耗民財有如木蠹交不激不隨臨機節縮省費
不貲雖諸權貴亦安之三年陞戶部右侍郎尋改吏部五年調
南京吏部本年陞南京吏部尚書未任六年陞戶部尚書時畿
甸河朔流賊劉六劉七齊彥名等騷張為中原患 朝廷命將
征討調度甚急四方以災上不得不履某處蠲稅糧若干某處
截留運粟若干興師四萬之儲不得時繼事皆難處交從容調
停權其輕重緩急務濟事不務近名又因民貧歛急不忍椎肌
竭髓取償歲額而至於官爵之冒濫賜與之無節非時之宴遊
無益之齋醮一切侈靡耗財之事終不能違其所蔽因其所明

乃歎曰胡爲使我民至此極也於八年乞休歸隱九峯受知

世廟於潛邸入繼大統起耆宿再入爲司徒以輔成新政爲國當
怨必欲杜利孔清利源還殷阜之舊國命民命身任不疑嘉靖
二年以老請歸四年卒於家贈少保謚榮僖平生言論恂恂誠
慤無大臣氣岸其清慎雅恬始終一致云

紀聞云公慎於交與若見素林公白巖喬公柴墟諸公二泉邵
公數君子號爲知己

王瓊字德華山西太原府太原縣人成化甲辰進士授工部屯
田司主事歷員外郎進都水司郎中弘治九年改戶部陝西司
郎中有治才留心國計凡舊卷條例悉錄之以備稽考

都御史正德二年陞戶部右侍郎三年改吏部調南京吏部戶部侍郎丁憂六年起戶部右侍郎兼左僉都御史賑恤畿甸山東地方七年陞戶部左侍郎八年陞戶部尚書瓊在戶部陝西司於泉貨出入數目素熟練嘗著論謂國初制親王歲支祿米一萬石後因地方豐歉或有減支郡王將軍俱有常祿亦因民供有限悉減支一半本色一半折色其折色多不關支又如初封郡王歲支二千石以後襲封俱支一千石後亦有例初封郡王亦支一千石又如郡王生子多至二三十人者有之慶成王生七十子夫以十子論之一歲該支米一萬五千石反多於一字王祿米矣先年陝西慶府分封郡王俱於慶府一萬米內分

撥并軍校亦於本府分出不知彼時奉何事例又如鎮國等將軍年十一二歲卽請封號祿米弘治十一年因災異禮部會官議修省事件郎中慈谿王綸白於諸大臣定議鎮國等將軍年及十五歲方准撥支祿米至今行之以民供論之則日益不給以宗室論之往往衣食不繼反不如庶民之家得自生計也又宗室犯罪降爲庶人者計口月給米石比與將軍中尉反得實惠宗室例不得種田納糧商販營利而常祿不給日見其貧乏不能存活矣又國初定制百官奉給皆支本色米石如知縣月支米七石歲支米八十四石足勾養廉用度後改四品以上三分本色七折色五品以下四分本色六折色後又改在外

官月支本色米二石其餘俱支折色其折色以鈔爲則每米一石折鈔十五貫或二十貫每布一疋折米二石京官折俸四五年不得一支外官通不得支俸祿之制果能守哉欲禁貪婪是以難也故在戶部於邦儲歛散酌盈濟縮不尚同亦不求異凡非分干請有違成憲者執奏不易苟可以厚宗室利官民者亦調停行之人服其有心計十年改兵部詳吏部

石玠字邦秀直隸真定府藁城縣人父諱玉天順甲申進士由監察御史歷官山西按察使玠幼警悟倜儻按察公教之易書卦爻推奇偶錯綜畫六十四卦試之輒不謬成化癸卯遂以易魁順天鄉薦丁未同弟少保文隱公瑤舉進士授汜水縣知縣

有惠政弘治癸丑召爲河南道監察御史乙卯奉覈大同邊儲
丙辰按甘肅辛酉復按陝西邊務興革悉中機宜監臨鄉試號
得人乙丑推綜三法司事左都御史浮梁戴公珊素知之事無
巨細委推理丙寅陞山西按察司副使督學政教人以修德行
務經學爲本己巳陞本司按察使庚午陞右布政使尋轉左至
是去按察公舊治僅二十年而吏民安其政始按察公時人以
爲世美常作瞻栢以志感辛未陞都察院右副都御史巡撫大
同玠久歷邊陲習諳戎務凡將領而下量才任使皆得其宜聞
有違法者裁以大體不爲深文小苛故人爭盡力邊境用寧未
幾入爲兵部右侍郎時遼東諸夷不靖命以左侍郎兼右僉都

御史往諭之玠宣布威德卽相率歸服使還詔磨一子爲國子生仍加俸一級癸酉陞右都御史乙亥陞戶部尚書時武宗數北巡日有調集軍費不貲玠經營籌畫未嘗告匱丙子二品秩滿加太子少保賜蟒衣玉帶玠恪守成憲會錢寧竊權阻壞鹽法累執奏與之忤被讒奪俸因懇疏乞骸得允賜勅乘傳還鄉有司月給米四石歲撥夫四名歸杜門却掃意緒澹然居二年以疾卒年五十九贈太子少保玠天性孝友待物寬厚居官以誠信愛民爲本自俸祿外無一毫妄取及請老歸葺所居僅蔽風雨與弟文隱公友愛備至喜讀國語左傳尤好淵明樂天詩所著有東溟漫藁藏於家

楊潭字

直隸保定府新城縣人成化丁未進士弘治十四

年任光祿寺少卿正德元年任南京大理寺右寺丞二年陞大理寺右寺丞四年陞本寺左少卿五年督軍餉陞光祿寺卿八年陞戶部右侍郎九年轉左十年兼僉都御史總督宣大軍餉十二年回部十三年陞戶部尚書十六年致仕

秦金字國聲直隸常州府無錫縣人弘治癸丑進士嘉靖二年任戶部尚書六年丁憂後起南京戶部歷工部改南京兵部尚書加太子太保卒贈少保謚端敏詳南戶部及兵部

鄒文盛湖廣公安人弘治癸丑進士嘉靖六年任戶部尚書致仕卒贈太子少保

梁材字大用南京金吾右衛軍籍順天府大城人弘治己未進士初授德清知縣廉靜寡慾平易正直輕徭薄賦興利除害邑人至今頌之正德二年陞刑部廣東司主事四年陞署貴州司員外郎議獄詳慎人無逆情時稱名法家大司寇洪公鍾每命各司錄其招稿以爲法五年改山東道御史逆瑾旣誅曉諭天下榜文出其手筆大學士西涯李公東陽見而愛之及作史紀事稿西涯同大學士楊公廷和各作一篇俱不愜意曰此等文章須史筆兼律筆乃爲得體今但有史學筆耳不足以傳後乃會司寇何公鑑中丞楊公綸各入其篇撰上送西涯看西涯獨取其所作喜云法史能兼可愛也遂以付史館且令其勿有所

改六年知嘉興府興廢舉廢節用愛民又精悍廉介布衣蔬食善撻發奸伏左右莫敢近吏牘章程有限刻不數月民有楊公再來之稱十年調杭州府賢聲日著皆稱爲神明十一年陞浙江右叅政恤荒歉平賦役兼理訟獄雪冤疏滯庭無宿案十三年進掌浙憲益崇憲體風節肅然己卯歲宸濠作亂於江右中貴畢真內應於浙西人心洶懼密謀於巡按御史張縉曰防禦要路在兵潛消不軌在豫草嚴市置綜理周密濠敗抗人恃以爲安十五年丁憂嘉靖二年再爲雲南按察使會土官彼此讐殺不寧者六年矣北蒞任巡按某謂曰土官讐殺久而未決諸道不能勘須公爲之材慨然諾即日遣牌逮土官依限而來

進見謂曰爾爲王臣不遵王法殺害生靈無筭論法汝當極刑
今姑貸汝死照例罰牛羊若干贖罪土官再拜輪服感謝卽引
見巡按聽候復職巡按以處大輕不允材以治夷罪律命告之
巡按復監候材曰若監恐生他意是我激變矣察院始從復職
且差官護送出三十里外卽飛報云夷果集兵相訶今無虞矣
巡按乃深服其明三年陞貴州左布政使尋調廣東奉身儉約
無他嗜好公退惟焚香讀書而已以是關節難通寸絲不入私
藏六年陞都察院右副都御史巡撫江西地方操履剛正事循
大職於邪正之辨尤嚴未數月陞刑部左侍郎尋改戶部未幾
進尚書自 世廟登極一詔放田租裁冗食不急之徵無名之

欽一切報罷三四年來民愈貧徵歛愈急加以水旱疾癘所在告災材深切爲憂每戒屬官勵廉悃恤民隱於行事得失志行清污考覈不爽毫釐尤力主節財爲第一義凡一切耗蠹圖計者必力持之故儲積不至於大竭十年以憂去十三年邊圉多事戶部缺人再起掌部事

琬琰錄曰梁材初知德清縣平易正直清介絕俗興利除弊薄賦輕徭雖古之循良莫能過也在任七年陞刑部主事歷員外郎中議獄詳慎人無遁情時稱名法家出知嘉杭兩府在在有德政頌聲盈途陞浙江叅政轉按察使時宸濠作亂浙江鎮守中官畢真爲內應材密謀於巡按御史張縉縛真人恃以安等

擢戶部尚書特勅監吏部都察院考察蓋異典也卽日赴吏部
凡降調黜留材議居多士論大服嘗曰秀才做官不要錢是分
內事不可向人說况欲驕人乎又曰要錢不做官做官不要錢
此吾生平自考語也又曰平生爲國薦賢不欲其人知之恐來
物議也又曰不欲爲子孫計者正恐上有吾君下有吾民也又
曰平生不報復犯而不校一句我敢當之

增

國朝列卿紀卷之三十三終

國朝列卿紀卷之三十四

南京戶部尚書年表

師達

山東東阿人洪武中國子生永樂二十二年任兼掌吏部事宣德二年卒於官

古朴

河南陳州人洪武中鄉舉洪熙元年任宣德三年卒於官

黃福

山東昌邑人洪武甲子鄉舉宣德七年任尚書叅贊機務加少保卒贈太保謚忠宣

儲懋

南直隸丹陽人永樂甲午鄉舉歷禮部左侍郎景泰二年陞南京戶部尚書未任卒於京

張鳳

北直隸安平人進士景泰三年任四年調南京兵部尚書歷戶部

沈翼

南直隸山陽人進士景泰四年任天順元年致仕

張鳳

詳前天順元年由戶部尚書調任五年以疾卒於官

陳翌

南直隸虹縣人進士成化五年任八年卒於官

程

信

南直隸休寧人成化八年以南兵尚書兼署部
事成化以前尚書不常設多侍郎并別部兼署

陳

俊

福建莆田人進士
成化十三年任

黃

鎬

福建閩縣人進士成化十六年任十
九年致仕卒贈太子少保謚襄敏

潘

榮

福建龍溪人進士成化二十年任
二十三年致仕卒贈太子太保

王

輿

南直隸武進人探花
成化二十三年任

黃

紱

貴州平越衛籍河南封丘人進士弘治二
年任四年改南院左都御史後卒於官

秦

紘

山東單縣人進
士弘治五年任

梁

璟

山西崞縣人進士弘治
十一年任十三年致仕

王

賦

湖廣公安人進士
弘治十三年任

鄭

紀

福建仙遊人進士弘治十七年以南京
戶部右侍郎乞休進本部尚書致仕

周

經

山西陽曲人進士弘治十八年起本部未任

熊

獅

河南光州人進士弘治十八年任正德元年致仕

秦民悅

南直隸舒城人進士歷南兵部尚書丁憂正德元年起任二年致仕卒贈太子少傅謚莊簡

高

鈐

南直隸江都人進士正德二年任本年致仕卒贈太子少保

楊廷和

四川新都人進士正德二年任歷內閣少師

張

縉

山西陽曲人進士正德二年任尋忤奄瑾下獄後起總漕右都御史復原官致仕

王

佐

山西和順人進士正德三年任尋忤瑾下獄

林

泮

福建閩縣人進士正德三年推本部尚書尋忤瑾勒令致仕未任

雍

泰

陝西咸寧人進士正德三年任本年忤奄瑾致仕

吳文度

應天江寧人進士正德三年推本部尚書未任致仕

陳

金

湖廣應城人進士正德三年任

張

泰

廣東順德人進士正德四年任
年推陞許奄璉勅令致仕

張

潔

廣西平南人進士正德四年任

李

瀚

山西沁水人進士正德六年任
任本年致仕卒贈太子少保

胡

富

南直隸績溪人進士正德七年任
一年致仕卒贈太子少保諡康惠

鄧

庠

湖廣宜春人進士正德十年任十四年致仕

王

鴻儒

河南南陽人進士正德十四年任本年致仕卒諡文莊

鄧

璋

順天涿州人進士正德十五年任十六年致仕

蔣

昇

廣西全州人進士正德十六年任
嘉靖二年致仕卒贈太子少保

楊

旦

福建建安人進士嘉靖元年任

王

縝

廣東東莞人進士嘉靖二年任本年卒於官

顏頤壽

湖廣巴陵人進士嘉靖二年任

鄒文盛

湖廣公安人進士嘉靖三年任

王承裕

陝西三原人進士嘉靖六年任七年致仕卒諡康僖

邊貢

山東歷城人進士嘉靖八年任十年卒於官

秦金

南直隸無錫人進士嘉靖十年任

許誥

河南靈寶人進士嘉靖十一年任十二年卒於官贈太子太保諡莊敏

王軌

南直江都人弘治己未進士嘉靖十三年任歷南兵

錢如京

南直隸桐城人弘治壬戌進士嘉靖十五年任歷刑部

劉天和

湖廣麻城人正德戊辰進士嘉靖十九年任歷兵部加太子太保

周金

南直隸武進人正德戊辰進士嘉靖二十年任

徐問

南直隸武進人弘治壬戌進士嘉靖二十四年任二十五年致仕

閔楷

北直隸任丘人弘治乙丑進士嘉靖二十五年任本年開仕

夏邦謨

四川涪州人正德戊辰進士嘉靖二十五年任歷吏部

趙廷瑞

北直隸開州人正德辛巳進士嘉靖二十六年任歷兵部

韓士英

四川南充人正德甲戌進士嘉靖二十七年任歷南兵

王崇慶

北直隸開州人正德戊辰進士嘉靖二十九年任三十一年改南京禮部

張經

福建侯官人正德丁丑進士嘉靖三十二年任改南兵

孫應奎

河南河南人正德辛巳進士嘉靖三十二年任三十五年開仕

盧紳

陝西咸寧人嘉靖癸未進士三十五年任三十六年改仕

賈應春

北直隸真定人嘉靖癸未進士
三十六年任改刑部歷戶部

馬坤

南直隸通州人嘉靖癸未進士
三十六年任

蔡克廉

福建晉江人嘉靖己丑進士
三十八年任三十九年開任

劉采

湖廣麻城人嘉靖己丑進士
三十九年任四十年開任

黃光昇

福建晉江人嘉靖己丑進士
四十年任四十一年改刑部

鮑道明

南直隸歙縣人嘉靖戊戌進士
四十一年任四十三年致仕

張舜臣

山東章丘人嘉靖乙未進士
四十二年任四十五年卒

馬森

福建懷安人嘉靖乙未進士
四十五年任改戶部

劉體乾

直隸東安人嘉靖甲辰進士
隆慶元年任三年改戶部

郭乾

直隸任丘人嘉靖戊戌進士
隆慶三年任四年仍改北

譚大初

廣東始興人嘉靖戊戌進士隆慶四年陞未任致仕

劉自強

河南扶溝人嘉靖甲辰進士隆慶四年任改刑部

曹邦輔

山東定陶人嘉靖壬辰進士隆慶四年任

傅頤

湖廣沔陽人嘉靖壬辰進士萬曆三年任

陳瓚

直隸獻縣人嘉靖丁未進士萬曆三年未上改都察院

殷正茂

直隸欽縣人嘉靖丁未進士萬曆三年任

畢鏘

直隸石埭人嘉靖丁未進士萬曆四年任

王好問

直隸華亭人嘉靖庚戌進士萬曆五年任

楊巍

山東海豐人嘉靖丁未進士萬曆十年任

劉堯誨

湖廣臨武人嘉靖癸丑進士萬曆十年任

劉思問

河南孟縣人嘉靖丙辰進士萬曆十一年由南右都推尋致仕卒

張士珮

陝西韓城人嘉靖丙辰進士萬曆十一年推未任致仕

魏學曾

陝西洵陽人嘉靖癸丑進士萬曆十二年任

傅希攀

直隸衡水人嘉靖丙辰進士萬曆十三年由倉場左侍郎陞任十四年改南京兵部

王友賢

山西寧鄉人嘉靖己未進士萬曆十五年任十七年十月致仕

南京戶部尚書行實

師達字九遠山東兗州府東阿縣人少孤事母孝年十三母疾危殆思食藤花菜地不常有達亟出求至城南二十五里得之及歸夜已二鼓道遇虎達驚而呼天虎舍之去持菜還母食之遂愈由縣學貢入國子生洪武二十五年陳情養母求仕特擢監察御史革除中陞陝西按察使時獄囚淹繫殆千人達至審其罪量輕重而決遣之浹旬之間獄爲之空丁母憂去官廬墓側不茹葷飲酒者三年壬午成祖入正大統召爲兵部右侍郎尋轉吏部侍郎永樂四年營北京宮殿命採木湖廣七年

成祖征虜命達總督餽道建議請軍量其程置堡使更遞轉輸則

民不困乏而軍得足食從之十四年命督修漢府十九年命
巡視湖廣安撫軍民二十年命署南京禮部事二十二年仁
宗嗣位進南京戶部尚書兼掌吏部事宜德二年正月丙申卒
於官年六十二遺官 賜祭命有司治葬事爲人有德軍人不
可干以私遂任吏部特典銓衡者率任已自用不容於人往往
不協輿論遂能詢衆以求公當且能持廉其爲從在北京視身
介特 文皇帝間語左右曰六部扈從之臣不合者惟達一人
蓋 上知之有素云

古朴字文質河南開封府陳州人洪武中鄉貢爲太學生奉

命清理郡縣田賦圖籍丁父喪歸二十年服闋隸五軍斷事理刑

遂奏家貧願仕得祿養母。太祖嘉之除工部營部主事授承
仕郎迎母就養京師二十六年母歿官給舟歸葬二十八年服
闋改兵部司馬部主事二十九年陞武選司員外郎授奉訓大
夫三十年陞郎中授奉議大夫革除三年陞兵部右侍郎授嘉
議大夫壬午年成祖正大統改戶部右侍郎轉左侍郎授通
議大夫賜文綺襲衣四年因建北京命採木江西有愛民之心
竣事特被賜賚七年上巡狩北京侍仁宗監國常奉命權
禮部兵部及詹事府事十八年扈行在洪熙元年改通政使是
歲陞南京戶部尚書授資善大夫賜誥命追賜二代遂謁告歸
省墓賜鈔襲衣朴事親孝非其義一毫不苟取居官臨事蚤作

夜思勤勞弗懈一志於公無敢干以私者謹守 祖宗成憲不

敢踰越或言事久於時小過不及者亦當損益就中終不爲動

尤惡貪墨戶部主事劉良素行不檢滿三載特考其績下良叩

上之左右人求得最考朴曰貪侈之人竟未覺露不改行終常敗

最考不可得也良遂誣奏他事既就逮繫 成祖燭其誣竟釋

朴他日吏部奏授良勅命封贈其父母 仁宗曰豈弟君子福

祿攸降是嘗誣奏大臣罪者其得爲君子乎不與良卒以賊敗

衆服朴之明所治職務退未嘗語其家人水蘂之操確乎不移

平素不事生產華靡雕琢之玩纖毫不留公退清坐一室書冊

自娛常病楊士奇往問之入其齋室几案間獨有自警編一帙

可以觀其所存。洪熙中誥辭有端厚簡靜操行清潔之褒。益見知於上者深矣。宣德三年卒於官。

黃福字如錫山東萊州府昌邑縣人。生而岐嶷異常兒。洪武初父冷讀書鄉校。年及志學補邑庠。尋選入郡庠。歲甲子得雋鄉闈。升胄監。歷項城清源二邑主簿。惠政及民。壬申陞金吾前衛知事。乙亥調龍江左衛。戊寅陞經歷。善於贊畫。素有志事功。識者皆以遠大期之。是歲四月上章論國大計。太祖嘉納。超授工部右侍郎。日見親幸。福感激圖報。爲政益力。譽望日隆。壬午六月成祖入正。大統治齊黃離間之罪。李景隆指爲奸臣。逮繫福曰。臣居大臣固當死。奸臣之名臣不敢當。上壯其言。釋。

之調左侍郎未幾陞工部尚書永樂二年奉命修補國子監
經籍板三年乙酉調北京行部尚書四年丙戌朝廷以安南
土酋僭號弗庭興師問罪福承命先赴兩廣營辦軍用處置有
方應期而集是年冬師渡富民江賊卽散遁明年夏渠魁就俘
遂郡縣其地復古輿圖設三司控制其土命掌布政按察二司
事初附夷民雖叛服不常福視民如子撫綏有道以是有變無
虞時總兵英國張公黔國沐公遇有機務必與計議福亦莫不
盡心大爲二公禮重福自膺重寄惟知有朝廷而不知有身
廉明正大遇事有爲不阿鎮守中官馬騏怙恩肆虐數裁抑之
騏不悅誣奏福聚太原宣化等府民兵欲爲不軌福亦具奏陳

情 上深照其妄曰此君子不容於小人寢其事居交趾幾二
十年及 仁宗卽位上言六事悉見採用驛召還京父老不忍
舍去泣送於塗者不啻千萬人至遮道不能行及抵京仍爲工
部尚書兼詹事府詹事賜以白金綵幣 賜誥命褒崇推恩及
其祖考洪熙乙巳扈從 東官至南京及回 上賓天 宣宗
嗣登寶位命董 獻陵事賜賚優渥旣竣事以久違先壟奏乞
歸省 上允之賜以路費馳驛而回未逾月復召還京嬰疾

上遣醫護命中使錫以珍饌疾愈持節 寧府行冊封禮適馬騏
激變交趾掌二司事兵部尚書陳洽累疏乞福復鎮遂驛召還
京 上命仍領布政按察二司事時黎利據別城叛命將討之

及至賊境將非其人失利福被執有酋首識之者抱持福泣且曰此我翁黃也此我翁黃也仍集衆羅拜且曰公不北歸我曹不至此言已皆泣旣而酋首以已乘舁至營黎利出迎卽置上坐問福所欲福厲聲曰我天朝大臣今至此願爾等速殺我耳黎利等連聲曰我父母我父母以厚資舁送出境乃上章曰禮送賢良福至龍州悉以遺物歸諸官庫分毫無與時總兵王通等爲法司所劾被收福旣陞見上以福不預軍旅特宥之卽勅與平江伯陳瑄總督漕運數年來致河道疏通舟艦無阻者實福布置有方號令嚴明也福又以遠輸勞費建言三事一曰足食二曰足兵三曰省役承命又議調行在戶部宣德壬

子調南京雖耳目不職筋力衰微惟念四聖眷顧之隆絕口不援例以謝政乙卯正月奉勅守備南京叅贊機務是年二月陞少保仍兼戶部尚書有白金綵幣之賜進階光祿大夫正統紀元春二月以學校之政久弛諸生多事記誦經書略不講究棄本務末難求實才上章言之用是天下學校一變舊習又特疏上言四事曰鈔法曰鹽法曰官俸曰田賦皆切時務四年冬十二月復賜誥命授光祿大夫加贈三代考妣并封其妻如制福風儀修整不妄言笑志氣豪爽器識過人忠敬孝友出於天性剛毅正直士風所屬其學根於經術不爲無用之文而典雅有法所爲歌詩有古作者意雖居繁劇手不釋卷喜納儒

士而重交游尤好薦拔賢材號稱知人當官不爲赫赫之名而
事之微細無不謹其在安南復輿地增置郡縣籍編氓定賦稅
而上其名數他若芻蕘之積軍餉之儲皆屬措辦庶務浩繁雖
日不暇給而隨事制宜咸有條理又能鎮之以靜上下帖然恒
戒官屬毋苛急於政毋侵漁其民時召父老諭以朝廷德意
俾各安其生理有懷來安輯之功學校新設未有教官選待次
之官有文學者委攝學事生徒知學漸有可觀官有改任及降
者初至或貧乏量給公廩以周之病故者給楮而歸其管政務
稍閒則俾掾吏輩講讀大明律及小學使知守法持身之道罔
弗悅從福素習律令藩憲具獄立斷之輕重得當主者不敢高

下其手而矜恤之意藹然行於其中自小官至一品始終以國家生民爲心斥奸闢諛無所顧忌下人有過多見優容所與交游輔於道憂國忘家老而彌篤公卿多推讓 成祖嘗命解縉論羣臣自蹇義而下凡十八人皆有褒貶獨福則曰秉心易直確有執守 上深然之兵部侍郎徐琦使安南回至南京福與駙馬沐公襄城伯李公以及五府六部都憲諸公往見於石城門外或指福問安南來者曰汝識此大人否對曰南交草木亦知名安得不識初福被召還京男婦耆倪追送者千萬人行百餘里不忍舍去福再三慰諭始皆泣拜而別非恩德及人之深奚以致此在官幾六十年廉介自守家無餘財自奉甚約妻子

僅給衣食所得俸祿惟待賓客周匱乏而已公退輒以詩書訓子孫或觴詠自娛嘗慕范文正公爲人誦先天下之憂而憂後天下之樂而樂之言因號曰後樂平生所作詩文有後樂堂交潘文集後樂續集過庭所授稿於家前後所上封事與廟謨廷論逸不盡傳而上自人主信之士大夫服之下至武夫穉子莫不懷之外至夷狄咸知其名而誦其美 朝廷累賜璽書極其褒獎視古名臣蓋無愧焉歲己未疾屢作猶強起視事五年正月朔力疾至公堂判署文牘至是月五日薨都城縉紳士大夫無不哀傷走弔哭者雲集其第計閭 上爲之悼歎遣官諭祭物有司營葬謚忠宣贈太保

日錄云 宣廟初召廉舊人召蹇義等數人寵待之皆依違承
順之不暇惟戶部尚書黃福持正不阿命觀戲曰臣性不觀戲
命圍棋曰臣不會着棋問何以不會曰臣幼時父師嚴只教讀
書不學無益之事所以不會 上意不樂居數日勅黃福年老
不煩以政轉任南京戶部優閑之實踈之也向使蹇夏諸公皆
如此持正其勢未必盡踈之則君德可修天下肥矣

三朝聖諭云宣德七年八月 上在宮中覽尚書黃福贊漕運
時言便民數事出其章示臣士奇且諭臣曰福所言皆知慮深
遠可行今六卿中其誰之倫對曰福受知 太祖皇帝最先大
用其爲人正直明果一志於國家生民今六卿中鮮及之永樂

初建北京行部命之綏輯凋瘵及得交趾命總藩憲之政安新
附之臬躬勤夙夜具有成績其才德兼備有大臣體諸卿誠不
及之福今年七十歲矣諸後進少年高坐公堂理政事享佚樂
輿馬騶從揚揚福四朝舊人乃朝暮奔走道路勞瘁不已殆非
國家所以優老敬賢之道 上曰非汝不聞此言吾嘗欲得一老
成忠直之人處之南京根本之地緩急可倚今以命福豈不誠
富士奇對曰福必不負 陛下任使明且 上命吏部改福南
京戶部尚書中外聞者皆悅蓋 上之納直言明於用人類如
此

大學士楊士奇因公秉心正大介然義利之辨以直道事君以

寬惠逮民在交趾二十年其人無老稚皆戴之如父母天下士大夫無論識不識皆知其爲君子也

儲懋字

直隸鎮江府丹陽縣人永樂甲午舉人十三年授

台州府學訓導有學行二十二年擢吏科給事中正統元年大學士楊士奇選授經筵尋陞翰林院修撰三年與修實錄陞翰林院侍讀八年陞戶部右侍郎十四年陞禮部左侍郎景泰二年陞南京戶部尚書未任卒於京詳禮部

張鳳字子儀直隸真定府安平縣人父益故爲禮科給事中伺母李氏有娠一夕夢大星出懷中覺而生鳳人以其異二歲取父書讀誦狀識者知有奇志隣有病者召巫治之鳳往觀之竟

不驗扣其神曰卿相在此及去神乃降隣衆驚異曰此子殆不
凡者稍長從太常少卿鄭雍言授春秋經每有講說卽能問難
穎悟異常已而母病躬侍湯藥衣不解帶母卒居喪盡哀人服
其孝永樂乙丑北虜犯邊 文廟親征父益以給事中贊理戎
務因主將失利沒於軍鳳年十四大父母垂白在堂家道蕭然
鳳哀毀踰禮與兄奉祖還家竭力侍養甚得歡心久之有司聞
其孝友選爲邑庠生鳳奮力於學雖祈寒暑雨不輟遂領薦入
大學時鴻臚序班缺員例選北人爲之吏部尚書蹇義見而異
之曰是生不可就此職也宣德丁未登進士第癸丑春擢刑部
江西司主事時江西豪民爲逆者千餘人繫獄未決一訊皆

其情獄上獲生者數百人能譽大振大司寇嘉其才特令總闔
部章奏及錄在京逮獄者正統戊午冬陞授本部右侍郎由主
事而進侍郎者前未有也已未夏以京城草廠出納多弊 勅
巡督之辛酉春改南京戶部右侍郎鳳上疏曰南京根本重地
糧不可不素蓄宜每歲分米二百萬石遂定爲令往年南京芻
粟專委之憲臣至是勅兼督蓋以出納嚴慎故也時人以其執
法呼爲張板 朝廷亦知其名己巳春賜璽書嘉勞有清勤公
慎之褒賚以白金文綺景泰壬申春陞本部左侍郎未幾進本
部尚書明年廷議轉南京兵部叅贊守備機務又明年召爲戶
部尚書時邊務方殷錢穀之費動以萬計多以不給爲憂鳳處

之裕然國用不勞而足天順收元 英宗復位思南京舊都得人庶可以壓衆心仍命爲南京戶部尚書兼督儲辛巳春以考績赴闕 上慰勞有加以足疾懇辭休致不允舟還疾甚未抵任而卒享年六十六鳳爲人正直而心地平易遇事敢爲人不敢以私干之尤篤於友義同門蹇於仕途者必極力助之故人李恂爲太常贊禮郎母老子幼夫婦相繼而卒鳳惻然遂養其母以終聘其女爲子婦教養其子至於成立又急於濟人嘗渡江偶遇一舟覆於急流卽捐白金購人救之舟中之人賴以全活性尤真率客至卽出酒殺對酌爲樂不計畧約與之接者未嘗不稱爲朴實君子云

沈翼字克敬直隸淮安府山陽縣人宣德庚戌進士授戶部主事正統八年出征雲南命爲轉運使十二年命徙沙州達官安置東昌平山陞戶部郎中有心計持已清廉蒞政勤慎十四年時虜寇欲據通州積聚勅翼焚之翼乃僞燒腐草烟燄蔽天虜遁去 上嘉其才幹陞戶部右侍郎與同縣大司徒金濂並以聲稱勅翼催償驚散糧船同平江伯陳豫鎮守臨清景泰四年陞南京戶部尚書值山東饑民流徙 勅賑濟全活四百餘萬待屬官嚴各畏憚勤職無敢怠廢五年翼等建議南京錦衣等四十八衛原屯比較新增軍除一萬七千六百一十八名起科舍餘民人一萬六千三百三十九名歲該徵細糧一十二萬九

千七百一十三石五斗零近因各軍奪占民田互相告訐該納
籽粒多無上倉又各衛選留操備運糧等項差占有妨屯糧乞
革其弊又奏准本部江西等清吏司歲辦商稅等鈔按季送部
委官看驗明白劄發應天府庫收完出給通關繳報如遇南京
光祿寺等衙門買辦一應物料開數呈部差委主事等官會同
監察御史拘集鋪行照依時值兩平估計價錢明白開填勘合
行庫放支給還物主不許乘機作弊七年又奉命行應天府上
元江寧二縣納戶買辦一應物料行南京戶科給事中一員都
察院委御史一員會同本部委官估計天順元年致仕卒於家
陳翌字冲霄直隸鳳陽府叮縣人幼有異質其父指以語人曰

吾家世農業人知吾所治者稼而不知種得吾見其稼以獲乎
宣德壬子中應天府鄉試正統丙辰會試中進士第授行在戶
部主事歲己巳虜寇犯邊王師北征命往永平等處備芻糧永
平圻內郡征輸繁重民無宿儲翌自方區畫民不厲而兵饒給
還奏稱一旨復出內帑金數萬兩命糴粟遼陽實邊廩竣事陞
郎中尋奉璽書督漕江西先是歲賦皆卒伍漕輓時 朝廷用
武始更以民有司承望風旨嚴程趣辦民始弗堪翌曰賦無後
期足矣奚以亟爲乃循行郡邑求得其富厚者俾具舟分漕且
諭之曰此一時權宜爾師還當無爾勞衆樂從爲於泰初上崇
孝敬錄忠義備財用清賦罔申舊典禮羣臣六事未報聞父訃

乞歸三司御史交章留之 上命卒事翌遽已馳歸喪次聞

命復往督漕抵京師而歸終喪會 上命廷臣舉堪任方面者卽

其家拜山西右布政使馳傳赴任問民疾苦爲蠲其逋稅至十

餘萬石民素利五臺山木至是有禁芟弛之樵蘇自若鴈門旣

設兵守禦益戍以民咸釋之使歸農業翌旣厚民生民可以役

其力矣始於其暇日築忻州城除道通平西嶺又感發其良心

俾修陽曲諸廟學益民不知勞而頌有德者至多不容口 英

宗復辟召還拜都察院右副都御史給從二品祿巡撫寧夏時

西邊連歲用兵民罷敝甚翌拊循之又籍其貧甚者計口給食

奏蠲逋租之累里正者寬兩稅設輸布帛厥貢果實皮革等物

皆乙權罷之其地故有宣聖廟祀禮與中州等項歲儉止行釋
菜登曰其費幾何而用以化導邊氓其利博矣俎豆之事吾何
敢廢亟復之久之亭來入寇邊將失利虜勢猖獗登檄諸部固
城堡繕器械募材武士爲土兵參以官兵守要害旣而 朝廷
命將出師虜始引去西師解嚴乃上章乞省墓不允然 上亦
念登在邊久思有以少休之矣七年陞南京戶部左侍郎 憲
宗卽位 勅總督京儲及屯田諸務始至會臺臣建議令諸司
察舉其屬登首劾罷其不事事者數輩而薦用其才且賢者廩
庾廢壞修復之資咸取具軍役而公有餘材則積以待敝登曰
糜有用之物困無告之民吾不能牽於吏議以隱忍於心也卽

日以便宜從事人謂翬一舉而能除數十年之弊復因災異上恤民力錄囚徒裁省鹽糧俸鈔三事丁繼母憂 賜祭葬旋命起復懇乞終制祥禫召還京陞南京戶部尚書總督如故三年乞奏最 上以其兼領諸務止之賜誥命進階資政大夫至是精力向衰在他人若可以少自暇逸而翬感知遇期於盡瘁每晨興入公館治事食頃議臺迄食肝未休屬僚文移趨辦不少貸卒之以此成疾疾甚猶日省署不廢成化壬辰六月卒於官翬爲人嚴偉立朝稜稜有風望自爲郎署人已憚其剛直無敢有忤之者及出更藩鎮入踐臺省位叙日高年德日茂晚生後進以得接約納爲幸而小官下吏趨走聽令有莫敢仰視云

程信字彥實直隸河間衛籍徽州府休寧縣人正統壬辰進士授吏科給事中累官兵部尚書兼大理寺卿成化八年改南京兵部尚書叅贊機務常因南京戶部尚書缺人署部事餘詳南京兵部

陳俊字時英福建興化府莆田縣人正統戊辰中進士第成化十三年任詳南京吏部

黃鎬字叔高福建福州府閩縣人正統乙丑進士授監察御史景泰五年陞廣東僉事天順三年丁憂七年起復補浙江僉事成化二年陞廣東左叅政四年陞浙江按察使六年陞廣東左布政使八年陞都察院右副都御史總督南京糧儲十一年陞

吏部右侍郎十三年陞吏部左侍郎爲人簡易溫和不炫風迹以引聲稱時尚書尹旻掌銓最久多自專主鑄處以謙讓不侵犯其事尹亦重之十六年陞南京戶部尚書具題南京各衛差兩淮運司關支戶口食鹽該吏各違限年久累催不報訪得各吏多有通同包納鈔貫無藉之徒將支出官鹽沿江貨賣又將各起引自影射夾買私鹽全無忌憚今後令行各該衙門如有差去官吏支鹽不回因而在外通同出錢豪勢之人誘引貨買及夾帶私鹽各二千斤以上者事發拿問明白承委官吏與出錢同行之人並發邊遠充軍若盜賣官鹽夾帶私鹽各二千斤以下者俱發衛分附近充軍其承委官吏只是在外躲避或逃

回原籍年久不曾支出官鹽挨拿在官依律問罪有違限一年之上者原籍爲民違限三年之上者公一千里外終身擺站原給引目俱追銷繳合支鹽斤不必補支中間出錢買鈔之人果是不曾同行盜賣官鹽止在本衛坐取本利者本利並追入官同承批官吏違限未一年者俱依律問罪照常例發落仍行南京各衛禁革今後完納鈔貫務要四角完全不許將爛鈔一槩混納及容令富豪官勢之人包攬納鈔展轉作弊并行兩淮運使如遇南京各衛支鹽官吏到場限一個月內俱要關文出鹽若各場官攢索要財物及限外刁蹬留難與運司各衛官吏容不禁約並聽本部參究追問其各衛官吏食鹽若再一年之

上不曾關支者不許再行納鈔造冊補支十八年奉命行本部編造勘合底簿仍行各運司等衙門查取官商姓名并原奉某號勘合於某年月日奉某例該支鹽若干開報該部查考其該衙門關領引目之日備開勘合字號客商姓名比對相同依數給領其客商領過引目鹽斤各運司提舉司務開支過某年項下若干事故者開除候年終通類分豁舊管收除實在數目造冊一樣三本一本送南京戶部查對一本送戶部一本送本處巡鹽御史并風憲官處若有一應奸弊聽該參究十九年又奉命行南京戶部給發引目其年月日俱一一填定分發各運司等衙門收掌給與商人領取有新舊那移者官吏坐以注法

賊罪本年致仕卒贈太子少保謚襄敏

潘榮字尊用福建漳州府龍溪縣人正統甲子舉福建鄉貢戊辰登進士第奉命齎銀幣犒師廣東景泰庚午拜吏科給事中彈駁有體論停起復抑奔競數事尤剴切多見嘉納壬申陞左給事中充荆府冊封副使不受餽遺甲戌歸省賜楮幣

爲道里費未幾值父喪毀瘠骨立事母不離側天順己卯始以服闋復任辛巳充蜀府冊封副使如使荆時壬午簡充琉球國冊封使賜麒麟衣玉帶以行至則奉宣德意王以下皆竦息聽命陪臣請爲中山八景記援筆立就有用夏變夷語國人爲之刻石甲申還朝陞吏科都給事中以母喪歸如喪父

時成化己丑復任庚寅陞南京太常寺少卿丙申陞南京戶部
右侍郎戊戌奉勅總南京糧儲尋改都察院右副都御史仍
領其事辛丑召入爲戶部左侍郎適尚書缺遂署部事免兩
浙償補鹽課人皆稱便會久旱漕河淤涸奉命督治運舟畢
至甲辰陞南京戶部尚書所出政令大抵以節財興民爲務丁
未孝廟登極以老疾懇辭給驛以歸令有司月給米二石歲
給輿隸四人弘治丙辰卒年七十有八贈太子太保

王慎字廷貴直隸常州府武進縣人景泰辛未賜進士及第
第三人授翰林院編修被旨偕修撰柯潛并庶吉士吳滙等
二十八人肄業東閣癸酉夏旱代祠東嶽甘雨隨注甲戌丁外

艱天順丁丑仍舊任庚辰同考禮部會試時稱得人尋命侍
東宮講讀辛巳興修大廟一統志成賜金帛癸未遷侍講甲申
憲廟踐阼以待從恩擢左春坊左庶子仍兼舊職勅克經筵講
官敷析明暢啓沃良多修英廟實錄分掌禮館成化乙酉改
南京翰林院學士辛卯服闋適南祭酒缺朝廷特用薦起於
家似嚴督率明賞罰不差遣上奏論便宜數事又修廟宇學舍
補刻書板建書庫門工悉就緒壬寅滿九載進南京吏部左侍
郎丁未召爲戶部左侍郎兼傳赴闕甫數月孝廟登極遷
南京戶部尚書未任復改南京吏部詳南京吏部

黃紱字用章貴州平越衛人正統丁卯以春秋中雲南鄉試戊

辰登進士第除行人陞南京刑部員外郎郎中級廉峻直執遇事
事聽發正色山立即重忤時貴弗恤智巧所避毅然肩之人率
竊笑其呆然亦以是獲名人業以硬黃日之部堂嘗缺官署堂
一印諸寮事之猶堂官才識超絕無不欽服譚千戶者大猾也嘗
奪民蘆場顯貴人無敢爲民直者級直之竟歸之民天順中陞
四川叅議督松茂諸倉兼備其兵糧革宿弊擒豪惡數百人舉
劾將官各當其功罪邊賴以寧成化中陞本司左叅政一日如
崇慶旋風擁輿不得行級曰汝冤氣邪故散予圖之至州齋沐
禱諸城隍輿夢若有神言州西寺者級旦起率官吏兵往寺圍
捕之鞠訊之遂盡暴其奸惡寘之法又攢典李節陽王親也侵

盜官糧巨萬數王爲祈免按之悉如法雖司錢穀然善摘發奸
伏以是威行境中嘗道川東青神令望風解印綬走久之進四
川右布政使奏開建昌銀礦許之大盜周主簿者哨衆抄掠檄
緩平之陞湖廣左布政使時兩京工興徵銀二萬不忍派民以
庫積餘充之勢豪馬快船巨萬坐逼索又 荆王奏徙墳塚悉
革不從省費巨萬又計除僧繼曉於是威惠大行常忤閣臣萬
安銜之三年六推咸抑阻緩知連疏乞罷凡三上不允至二十
三年安去位陞右副都御史巡撫延緩劾叅將郭鏞都指揮鄭
印李鐸王琮葭州史知州等又計捕豪奸張綱乃於是拔才能
察幽隱問疾苦飭廢墜申號令修器械嚴警邏節候望邊政爲

新及見飲馬婦片布遮其下體乃悲以泣曰嗟乎貧至此極乃驅之戰守邪於是令預支米三月會詔毀菴寺使汰尼解軍門給配鰥士人人歡悅無不願爲死者及去尼有携子女拜送跪傍者云弘治二年陞南京戶部尚書既官六曹益無所傾避威稜截然五年特旨改南京左都御史詳南京都察院

秦紘字世纓山東單縣人弘治五年任後轉戶部尚書詳戶部梁璟字廷美山西太原府崞縣人景泰癸酉鄉舉天順甲申進士擢兵科給事中進都給事中陞陝西左叅政歷

左布政

使成化二十年陞都察院右副都御史巡撫湖廣地方二十三年回籍弘治六年起原職巡撫四川地方本年回院管事陞南

京吏部右侍郎十一年陞南京戶部尚書時部署并 玉音樓
傾圯乃稽每歲部運違限所入贖罪銀修理具疏以聞 詔從
之十三年以星變致仕

上軾字用敬湖廣荊州府公安縣人天順甲申進士授大理寺
右評事成化五年陞右寺副七年陞寺正十二年陞四川按察
司副使十五年以憂去接喪二十一年服闋補陝西副使弘治
二年陞四川按察使三年陞南院右僉都御史兼提督江陽八
年陞都察院右副都御史總理南京糧儲本年改巡撫貴州九
年陞大理寺卿十三年陞南京戶部尚書十六年 命兼左副
都御史提督貴州軍務本年復命仍蒞南京戶部事奏准各處

解到黃冊如有紙張粉飾等項差來人役照例送法司問罪經該吏書人等行各處巡按御史查提問罪黃冊駁回易紙另造自駁回改造之日爲始除水程之後定限半年以裏造完用印固封送赴南京戶部轉發後湖查對若再故違一月一日不用印封送者經該官吏里書人等查提問罪仍照違限日月住俸滿日方許關支若係解人在途遲延違限止將解人叅送法司問罪其駁查黃冊紙劄等項俱要原經里書自備不許科擾於民冊完仍差吏書親送到湖交割以憑查對凡後湖查冊官員將南直隸浙江江西湖廣福建四川廣東廣西弊多去處先行查對每於一處或二處得完卽便差人齎進追問改止其餘

以次查對候通完之日類造總冊赴京復命十七年改南京兵部尚書叅贊機務詳南京兵部

鄭紀字廷綱福建興化府仙遊縣人號東園天順庚辰進士選庶吉士授翰林院檢討與同年洛陽劉健南昌張元禎爲莫逆交劉嘗稱之曰鄭廷綱有經濟之才未幾以親老移疾歸倣浦江鄭氏家範闔門聚食種樹治生冠婚喪祭悉從文公家禮延孝子劉子賢雲洞講肄歲給穀數十斛以贖其貧往時縣官科率無藝紀爲立定規裁省冗費率鄉人修復諸處橋梁家食凡二十年再起供職成化二十三年遷浙江提學副使令諸生兼讀五經白文行鄉射禮品藻不淆雖擯亦服弘治三年召入爲

國子祭酒教規甚嚴杜絕干請監有膳餘銀不例取同僚以紀形其短銜之紀以前輩自處遇科道官不能折節爲禮因相與攢摭其事論劾 孝廟謂紀到任未久未宜有此令條折以聞改南京通政司左通政七年陞南京太常寺卿十五年陞南京戶部右侍郎適南畿災紀以漕米權宜水兌積出餘米二十餘萬石賑濟又將月糧放支本色以平米價奏革京儲冗食鹽鈔攬納之弊皆有惠利及人然竟以前被論踵襲言之不已紀亦屢疏乞休時劉公健在內閣重其才固留之十七年進南京戶部尚書致仕邑舊無城垣紀力請於官修築之人賴以安卒年七十六賜祭葬如儀仙之人才宋時與蒲埒人國朝科日常之

官亦不顯獨紀歷清華至八座爲其邑之冠詩文清新敏贖有
東園文集吟稿歸田錄奏疏若干卷

周經字伯常山西太原府陽曲縣人弘治十八年由致仕戶部
尚書起本年未任後起禮部尚書致仕詳戶部

熊翀字騰霄河南汝寧府光州人成化己丑進士授武進知縣
有政澤及人以薦擢監察御史嘗捧勅巡按江西風裁凜然

時寧藩親毛氏者橫於里翀以微服至其家伺之盡得其罪狀
乃密獲及其黨惡者數百人悉寘以法於是豪右屏息弘治八
一年累官都察院右僉都御史巡撫山東地方十年陞右副都御
史巡撫陝西地方居官嚴毅人見多畏憚之十二年陞工部左

一侍郎本年改兵部左侍郎十八年陞南京戶部尚書正統元年致仕性剛介嚴毅不敢干以私所著有止菴集

一秦民悅字崇化直隸廬州府舒城縣人天順丁丑進士授行人司行人歷工部屯田司員外郎成化十年陞廣平府知府剛毅開敏多直氣能卓然自立政出公平而百廢修舉士民宜之如檢勘荒田馬地共三十餘頃辯寃活獄一十九人招流亡進六千戶皆綽然在耳目十九年滿九載方去民立生祠求大學士劉翊紀其政績祀之陞江西右叅政歷三載陞右布政弘治三年轉左民悅在江西凡三任察民情最深敷政多從寬恕不尚嚴苛四年陞都察院右副都御史巡撫順天地方飭薊州兵備

未幾召爲戶部右侍郎提督倉場六年回理部事七年改吏部
丁憂十年起復補左副都御史理院事十一年復改吏部右侍
郎十二年陞南京吏部尚書初官留都給假者紛紛值監丞楊
文具告給假回籍省祭遷葬養病民悅駁問一狀之內四事並
告難以施行且嚴禁之於是其風稍息十三年爲星變率九卿
題准南京文武官員每年該關俸糧折支絹布小麥俱在秋冬
三個月內接連關支各衛官員無米食用乞照在京事例將絹
疋移於四月布疋移於八月小麥仍於十一月關支本年陞南
京兵部尚書叅贊機務安靜不掠聲稱十四年丁憂正德元年
起南京戶部尚書二年致仕卒贈太子少傅諡莊簡

高銓字宗選直隸揚州府江都縣人銓初娠時母常感異夢比
生岐嶷不凡甫毀齒日記數百言十三能韻語天順丁丑補江
都縣學生少保高文毅公毅一見奇之吏部王端毅公恕知府
事擇諸生俊秀者親訓於資政書院尤器銓成化己丑舉進士
授大理右評事潛心條格上疏言優致仕申比附分曠職杜詐
作辨盜情廣收贖六事皆中時弊出錄福建囚平反至百餘人
會勸其勢家人獄不爲私撓人服其介丙申擢山東僉事遭母
憂戊戌服滿補河南值歲歉人相食朝廷遣侍郎往賑銓實
分領其事驗丁丑程遠近以時給散吏有侵尅輒嚴禁之雖有
憑附者亦不貸流移四集處其食息咸有方旣而疫作乃請衣

糧散遣之又爲叢塚以處死者所活甚衆歸德有黃河退地千餘頃爲親藩所據州守且以負租被訟朝命中官侍郎都御史按之銓謂負租宜當其守違制罪地則請還民爲業中官怒出惡語脅之執不變後藩亦不以河退地請其官長私託於長吏欲分其半與之銓又執以爲當還民民竟賴之弘治元年陞浙江副使攝司事清案牘羣吏屏息勾考戎籍宿弊盡革五年陞河南按察使風紀振肅如在浙江河決張秋命官浚治銓建治河十二議贊畫居多賜白金文綺八年陞右布政使尋轉左人號得體會人覲吏部奏銓治爲天下異等九年陞右副都御史巡撫保定立九則編徭役慎固邊圉時奸民有獻

皇莊者實皆民田侍郎許進等奉命會勘冤聲撼野至歐州縣吏不得行許遽欲執以復命銓曰若是固爲民至意恐萬一不測如民重得罪何請勘實以聞上雅愛小民必不忍奪其生業以利左右奏上果然十三年陞南京工部右侍郎屢掌吏戶兵三部事癸亥江淮饑復領賑濟所活亦衆陳荒政八事多行之正德二年陞南院右都御史獄精允人以爲不冤本年陞南京戶部尚書奏改衛士廩米折色每月兼給著爲令其於名節尤刻意不苟尋忤逆瑾令致仕又逮獄褫其官瑾誅復原官致仕始仕時或勸增年以就科道選亟謝不聽及爲僉事歷臬經九載四薦乃得遷脫罹逆禍亦無幾微見言面人以是尤

稱之家居孝友仲兄病嘗密以身禱既仕節俸入以爲壽儉約自將不喜飲博自謂治律之功不減治經史外星卜醫藥諸書無不涉獵旣老猶然儀觀修整尚禮讓鄉黨雖小吏來見亦束帶迎送以爲禮於後進名士推挽惟恐後人以急告未嘗不爲之盡心然不自德也始號平山晚更號遺安老人所著有平安山遺稿若干卷壽六十有九贈太子少保

楊廷和字介夫四川成都府新都縣人成化戊戌進士改庶吉士授檢討累官南京吏部左侍郎正德二年陞南京戶部尚書本年改戶部兼大學士入閣歷少師詳內閣

張縉字朝用其先順天寶坻縣人曾祖諱仲和勝國時爲山西

太原路總管因家陽曲繙幼穎悟不凡既冠領天順壬午鄉薦以成化己丑登甲科初知鈞州鈞民多頑犢以嚴治之皆斂手奉令尋以內艱歸終喪改知滄州居南北之衝且頻病雨潦多方賑救民賴之安權貴欲請境內地爲莊田繙不可其事乃寢陞南京工部郎中剷除宿弊羣匠故囊橐爲奸利者無所容未三年陞杭州知府蓋重其地而屬之也繙以廉正自持守臣臺使以及監司無弗敬信者在郡八年節縮百費省民財十有餘萬陞山東叅政去之日留其履以識不忘弘治癸丑河決張秋上命平江伯陳銳都御史劉大夏治之百需悉委調度甲寅功成遂陞通政司右通政屬之行河特衝決之餘溝防不治繙相其

緩急以漸修濬無所遺又於決口之東甃石岸數里以圖勿壞
又新築南旺東堤樹柳其上每歲夏秋水溢挽卒得分行無阻
至今使之庚申八月陞都察院右僉都御史巡撫保定等府飭
士馬以防寇掠有發輒得畿內寇幾絕嘗疏陳八事皆切民病
辛酉四月陞右副都御史巡撫宣府虜入遮擊屢有斬獲之功
是歲十一月改督漕運造舟之價必預給漕卒必選其精壯者
補之癸亥甲子淮揚連歲告饑奏留糧米若干萬石所全活甚
衆丙寅陞戶部左侍郎時逆瑾專政惡其不已附者會南京戶
部尚書缺以縉往補而卽因事逮之時同逮皆復官惟縉致仕
過滄滄人留止之乃家於滄然瑾銜縉未釋也復與尚書文

同下詔獄罰輸邊米伍百石又坐前揚州災嘗改揚之兌運二萬五千石於鳳陽上納璫以爲更制除其名華未劉齊二賊掠畿甸滄被圍七日城中士民欲許賊和以緩禍來卽縉謀縉曰許之和是降城矣降於法何如吾家三十口誓不能降賊而生也衆義之相與嬰城固守勇百倍於初賊勢挫其圍遂解未幾復召爲右都御史仍督漕運兼淮南勦賊事至則選鋒追勦又設伏以遏其衝賊圍邳濟素知東海千戶張瀛者以謀勇稱遂令率健士開南柵迎敵有三騎突來蓋賊魁也皆中矢斃其黨遁去城乃完七月賊捨騎入江縉於儀真於瓜州皆嚴兵以待既而賊勢日蹙乃有狼山之捷上勞以璽書金帛時境內累

經兵燹民物凋瘵又加意撫綏漸有生意然縉亦老已倦於勤矣凡七疏乞休不允甲戌以入議至滄不進復疏乃許之仍復南京戶部尚書致仕命有司給歲夫月廩凡居滄有一年而終年八十有三縉器宇魁岸風神秀朗持已蒞下嚴重有威理焚處劇綽有餘裕故起州郡歷方岳陟臺省所至輒著能聲樹成績居家孝友交接以誠好賢喜事多所崇獎生平嗜學手不釋卷星曆醫卜皆臻其妙性好吟咏有玉雪遺稿若干卷其所建白又有奏議若干卷藏於家

王佐字廷輔山西遼州和順縣喬莊里人父義仕至陝西故關巡檢初丞譚城驛有中貴宿驛久人厭苦之佐夜密令人取庭

樹巢鶴黑身朱喙而縱之中貴見而驚熟視之故鶴也詰諸館人皆驚以爲不祥遂去之年十四攻舉子業弱冠爲縣學生二十六舉鄉試成化戊戌登進士第內閣登黃榜終少一卷求之不得或曰狀元卷封內若二然啓之則佐也偶爲封者所誤不得已足之榜尾試政吏部文選司太宰尹旻嘉其器識數召與語兼咨訪人才辛丑除文選司主事二甲進士銓授最後一人例當外補州守時安陸孫交在選中有爲下一人地者謂當至縣止佐進曰孫某年少且有學識蓋與京職以成就之尹公用其言尋丁外艱去甲辰服闋補考功司丁未當朝 觀之期例覈天下諸司官佐博采輿論必求其當凡貪酷吏雖親故不出

庶貴勢請託一無所撓或本廉吏而為毀者所中傷則力爲申雪之遷者功員外郎弘治庚戌進驗封郎中有土官承襲例當駁眾屬一京宦也白金若干祈免佐卻而逐之其人愧恚自是不復敢見太宰三原端毅王公恕知佐亮直調考功司又值

覲期黜貪濁斥庸懦拒請託視前加嚴焉山西提學僉事楊文卿每憾不薦已比遷山東副使以公務至京見少宰陽曲周公經謂之曰王郎中數稱君賢楊乃歎服甲寅遷太常寺少卿提督四夷館尋丁母憂去服闋至京師十年補太常寺少卿留逾年不得調相知者欲佐具禮幣往謁執政佐應曰諾實未嘗往又趣之行且令一婦施從所之明日佐過執政門不入而去相知

者佯問曰：「政云何？」佐曰：「執政意無他也。」因言其狀爲之一笑。改順天府丞，教下事繁動涉權要，佐處之裕如。提調鄉試費省，事實乙丑遷光祿寺卿，節縮供用所費甚多。正德丙寅遷戶部右侍郎，奉勅勘功臣地於常州。丁卯轉左侍郎，時劉瑾用事，凡大臣科道使外遷者皆有厚餽，不然立見罪黜。佐獨無所餽，瑾常詔人曰：「世言山西人吝，果然自是銜之。」屬時遣使稽覈各邊糧芻，先後撫巡憲臣多坐累繫獄。佐一日同尚書顧佐輩見瑾，瑾言及茲事曰：「朝廷必誅戮一番人，乃懼耳。」佐曰：「本朝未嘗戮大臣，恐不可開端。」有毀吏部尚書許進者，瑾信之，語諸大臣曰：「許某奸邪，若某尚書可爲吏部。」佐曰：「某與某尚書素厚。」

與許交淺然許素有時望某尚書恐不如毀之者因譖曰王某實黨進瑾益怒遂遷南京戶部尚書欲姑遺之去而徐圖之耳比至南京以戶部廣東司失金幣冊逮先尚書韓文輩詰問遂逮佐下 詔獄以爲罪令致仕歸又中以他事罰粟千石佐歸家行李蕭然圖書數卷閉戶披閱子弟親識非有故不得見越四年卒佐性至孝祖父性嚴善承志意孤介寡合鄉隣無當意者惟善李昂一人謂其有篤行命子都憲雲鳳娶其女至白首恒念之存問其子孫在仕途所交不過數人所敬服者二三人而已慈惠下逮使人若恐傷之御史則嚴曰不如是彼將肆志勇於爲義故人子貧無所於託者每訪求之猶善記憶凡所涉

歷終身不忘初爲太學生所著有橋門錄比官於朝有朝事
目錄在吏部有太宰問藏於家

林泮字用養福建福州府閩縣人成化壬辰進士授南京大理
寺評事歷陞寺副寺正盡心庶獄嘗有吳鑑者宜津人以與強
賊同姓名逮繫又有三男子流丐者江西人亦捕爲強賊苦刑
部陸郎中刑皆自誣服泮駁復踰時果獲真盜又有吳能者六
次父告不孝復息詞最後泮執之竟請上裁置之法癸卯以
母太安人喪去位弘治初服闋赴吏部陞廣州府知府府治省
城吏奸政弊訟繁泮處之若無事例有堂食泮一不指染嘗過
厓山門有石刻元丞相伯顏滅宋於此泮改刻宋太傅樞密院

使張世傑死節於此凡郡之忠義貞節多所表異郡有藍漢諸
山洞蠻時方猖獗洋承檄以兵入其穴擒斬渠帥因圖地形會
總兵畫圖之有豐湖保十三村民皆爲盜拒敵洋至其地諭降
之戊午陞廣西叅政奉勅總督糧儲兼理屯田時逋欠三十
三萬洋偵知湖米方賤下令減直收銀差官往糴湖米民甚便
之輸不後時旣半年逋欠畢集金州屯田千戶謝表剝下奉上
軍民切齒凡可以害人取財者無不爲洋白上司窮治之一方
稱快辛酉陞江西右布政使癸亥轉左布政使廉公有威吏弊
一熄值五載俱豐穰民間頗有積穀催科雖緩而守令邀功不
置歲終輒督糧里報完亦嘗以報完違例罪一令然沿效成風

遂莫能救江西之民自此困矣嘗以山東滙澤陳先生澹所著
禮記集說 文廟編性理大全書既取爲大註是陳有功於禮
奏乞從祀孔廟不果正德丙寅登順天府尹省寺供億悉復舊
章威讐豪右畿輔以治丁卯陞戶部右侍郎總督太倉糧儲時
逆瑾方用事泮惟內無所失而處之甚恭會奉 勅往鳳陽河
南會勘徽府田土事竣加俸一級戊辰陞南京戶部尚書授資
政大夫時逆瑾益橫大臣多從中罷免甚者中以法泮亦惴惴
有去志方啓行出都門傳 旨着致仕仍 賜誥褒贈廩給輿
如例泮忻然以爲得保全出望外矣抵家未幾四年二月瑾以
他事矯詔罰泮米二百石輸口外泮家貧素雖歷官三十七年

俸資之外一毫無取家又先被火歸之日寄居寺宇書房者數十年口外之役不勝艱苦泮亦視之坦然不少憂憤故人亦服其濟德云

雍泰字世隆陝西西安府咸寧縣人初母夢神授白蓮一莖生泰景泰中鄉舉成化己丑成進士授吳縣知縣吳濱湖淪田千頃泰作堤民受其利至今賴之名曰雍公堤民有誣婚殺其女者蓋非已女殺之湖中石下圖財泰明其誣及行取擢爲御史吳民涕泣餽以樓船竟反之民歌曰時苗留犢雍公返舟巡南城豪右歛跡聲震京師十一年巡兩淮鹽力遏權要及滿巡撫奏復留一年兩淮竈丁鰥者俱與完室淮人歌曰容邊

檢案渾無硯海上遺民盡有家十四年陞知南陽唐府奏取民田千頃秦曰民去王誰與守力執不從久之陞山西兵備副使防胡以安民爲先胡經年不敢窺塞千戶韋英誣民百人謀逆巡撫命署勘實秦不可後百人竟得釋其年陞山西按察使獄無冤鬱紀綱肅然弘治 年遷湖廣叅政辯出死罪數人人皆圖像祀之 年陞浙江布政使民多鬻販私鹽秦先收勢家治之衆遂斂跡十二年陞右副都御史巡撫宣府士民祇畏邊陲宴安十四年叅將李傑爲輔臣李東陽姪恃援橫作不法秦令縛下以大杖擊之三軍股栗由是被譖罷歸居韋曲正德三年言官潘鐸薦秦有敢死之節克亂之才起爲操江左副都御史

七月陞南京戶部尚書時與平人宦瑾用事以泰不附已八月
勒令致仕嘗薦泰者皆獲罪自是復居韋曲族黨有犯必告有
司曰某是某非令以法治之凡縉紳失守人雖造門不見平生
寡言笑奉身儉素無私書無非義之餽之受靈寶太宰許襄毅
公進謂邢知州曰吾遙望關西見有二高一爲華嶽一爲雍世
隆也年八十卒卒時榻下有聲若雷鳴所著有奏議稿五卷止
誼菴詩集六卷傳世

吳文度字憲之其先福之晉江人父某教諭黃梅以疾就醫南
京遂家應天之江寧文度早孤與伯兄居抗志力學成化乙酉
舉應天鄉試登壬辰進士授浙江龍泉知縣龍泉故號難治文

度招集父老示以禮義其強梗者治以法境內肅然己亥徵拜
南京山東道監察御史秉持風采多所建白丁未擢知汀州府
時徭人出沒爲患文度設方略招致賦役帖帖如居民以其餘
力修舉學政考德問業親督勸之人才翕然以變秩滿乃相與
立祠勒石祀而頌之曰視祠之廟貌如吳公也弘治戊午擢江
西布政司左叅政壬戌進山西右布政使閱歲轉河南左布政
使力專才贍一時弊政釐革殆盡下和買之令禁無名之役人
至於今稱之乙丑拜都察院右副都御史巡撫雲南屬夷酋阿
本負險稱亂文度至撫先文告猶弗率乃進師親臨行陳擒其
渠魁地方大定夷民納貢賦如中土捷聞天子降勅獎諭賜

與甚厚正德戊辰擢戶部右侍郎尋轉左侍郎未幾拜南京都察院右都御史迎瑾用事索賄文度弗應是歲十一月改南京戶部尚書致仕文度既退蕭然深居澹恬容與無異韋布時知已過從輒治饌具飲宴盡歡達官貴人至則避不見久之逆瑾收諸所嘗傾害者朝廷次第收復之士論多屬文度召命且下而以疾告遂不起壽七十有交石稿若干卷行於世

陳金字汝礪湖廣德安府應城縣人成化壬辰進士授婺源知縣十五年擢南京山西道監察御史二十一年守制弘治元年補江西道監察御史四年陞山西副使九年陞貴州按察使十年調雲南按察使十一年陞雲南左布政使十二年陞都察院

右副都御史巡撫雲南地方十七年陞南京戶部右侍郎正德
元年陞都察院右都御史總制兩廣軍務兼理巡撫時御慶節
寇殃民令討平之三年轉本院左都御史仍舊總制巡撫本年
十一月陞南京戶部尚書四年七月改都察院左都御史掌院
事詳都察院

張泰字叔亨廣東廣州府順德縣人成化丙戌進士授沙縣知
縣為人端謹樂易政尚寬平而公庭亦無留事民愛戴之嘗修
飭學校重建先賢祠修建縣治事集而民不擾公暇輒戾學躬
勵諸生學業刻羅豫章陳止齋遺書以詔學者邑士用勸時縣
經兵燹荒疫泰至百廢具舉甫三載以賢能徵授浙江道試御

史巡視通州倉革包攬之弊言及 宮闈與政 上怒杖責之

幾死提督京畿學政公明爲衆推服丁憂養病十有餘年弘治壬子復起出按雲南奏開解額五名繩賊吏之尤無良者先是象馬恩操執木邦宣慰司罕乞法囚禁四十年未有以處之泰於是會議徵各漢土官兵臨其境以公移諭之思操感悔遂送罕乞法復其故業械其首禍者三十餘人請罪積患一朝頓釋遠近稱其能旣復命特劾中貴楊戴二人及戚里壞法者 上怒甚旣而霖威罰俸半年尋陞南京太僕寺少卿又改大理寺十三年薊州 皇莊興牧馬草場爭地界日久累勘不明奉命會武臣清理泰密訪得永樂中開設圖本按之權貴始服十八

年乙丑陞右副都御史總督南京糧儲遂疏專委任清兌支均俸糧委監收監儲積修常平清軍數總部運限稽派重查糧稽住俸省守支十二事俱允行正德丁卯遷工部右侍郎公出納杜請託戊辰陞南京都察院右都御史時逆瑾霍燄熏灼所求不副奇禍立至泰當奉表入賀惟以土葛布遺瑾瑾知清

苦然猶憾之會吏部以南京戶部尚書員缺疏奏姓名以請內批陞戶部尚書着致仕家居三月卒朝廷遣官賜祭葬

張濬字仲澁廣西桂林府全州人成化戊戌進士選庶吉士授編修弘治己酉轉侍講戊午充東宮講讀官辛酉主考順天鄉試十二年進侍讀學士十八年陞學士尋遷國子監祭酒正

德元年擢禮部右侍郎二年轉左已巳陞南京禮部尚書本年
改南京戶部尚書六年改南京吏部尚書詳南京兵部

李瀚字叔淵山西澤州沁水縣人成化辛丑進士十八年授樂
亭知縣二十二年行取擢四川道監察御史弘治四年丁憂七
年起復補浙江道監察御史十二年陞湖廣副使十三年丁憂
十六年補河南副使十八年陞湖廣按察使正德二年陞河南
右布政使本年轉本司左布政使本年五月陞順天府尹本年
九月陞都察院右副都御史總督漕運三年陞本院左副都御
史佐理院事五年陞吏部右侍郎本年八月陞吏部左侍郎六
年陞南京戶部尚書本年致仕卒贈太子少保

胡富字永年直隸徽州府績溪縣人成化戊戌進士十五年授
南京大理寺評事二十年陞寺副二十二年陞右寺正弘治
年陞福建僉事 年丁憂 年起復補山東僉事十年陞廣東
副使十五年陞湖廣按察使十七年陞陝西右布政使正德元
年陞陝西左布政使二年陞順天府尹三年陞南京大理寺卿
忤逆瑾勒致仕四年瑾誅起陞南京戶部右侍郎七年陞南京
戶部尚書屢疏裁冗食祛宿弊事涉權倖多格不行因乞休十
一年疏六上始允致仕嘉靖元年卒贈太子少保謚康惠富敷
歷中外四十餘年始終一節士論重之

鄧庠字宗周湖廣彬州宜章縣人成化壬辰進士授行人司行

人擢浙江道監察御史丁憂起復補河南道監察御史弘治四年陞河南副使十一年陞河南按察使十二年陞廣東右布政使十四年陞廣西左布政使十五年陞都察院右副都御史總督南京糧儲本年回籍正德六年起原職撫河南地方本年丁憂十年起陞南京右都御史掌院事本年陞南京戶部尚書十四年致仕

王鴻儒字懋學河南南陽府南陽縣人幼穎悟絕人書過目卽成誦甫成童作書端勁得歐顏法有親屬爲府吏者致鴻儒佐書郡守金成段堅見其書奇而問之吏以實對遂召見歎曰風神清澈非塵埃中人也乃留居府中續食授衣親謀其業遂入

郡學爲諸生提學天台陳選校士至南陽閱其卷驚曰此經世
之文非舉子業也成化癸卯發解河南丁未進士授南京戶部
主事初領倉庾出納明慎軍民稱便遷員外郎擢舟淮安督稅
鳳陽皆有聲績於是衆益信爲全才弘治九年陞山西僉事十
五年進副使俱提學以陶養爲本以文藝爲末抑浮崇雅先行
檢而後詞華品藻高下毫髮不爽又好面誨人每生有請益因
材開發終日不倦士子翕然歸之 孝宗一日召兵部尚書劉
大夏論時政且及當時人才 上曰如山西副使王鴻儒他日
可大用大夏對曰斯人才行誠不易得 聖論是也劉大夏後
以告鄉人胥員外文相曰 朝廷用此等人方擔當得大事乎

老不及見子其識之正德四年陞國子監祭酒本年以守正忤
逆瑾回籍八年起南京戶部右侍郎十年改吏部十二年轉左
侍郎以甄拔人物爲己任好崇實行不純采虛名嘗曰濟天下
事惟誠實者能之趣名者亦趣利無益也不見夏忠靖王鹽山
乎惟知有朝廷而不知有親黨惟知有天理而不知有身家
社稷生民於是攸賴識者題其言十四年陞南京戶部尚書尋
乞致仕鴻儒於書無所不讀大要以窮理致用爲主雖一字之
異同亦必求其原而審其義之所安故其所得宏博奧衍交發
互益其於六經沛如也善觀史每以歷代君臣之行事爲案而
已從中斷之審得失辨邪正上下數千年如指諸掌尤明習國

家故事自 祖宗用人行事及前輩立朝行己之詳皆能一一言之至論當世之務原始必要其終可否成敗必證以古人之故至誠待物和而有禮不問人私人亦不敢以私問由是士樂親之無問識與不識皆知其爲盛德君子云

鄧璋字禮方順天府涿州人成化丁未進士授江西南昌府推官弘治七年擢江西道監察御史十五年陞大理寺右寺丞十七年轉右少卿正德元年陞都察院右僉都御史巡撫遼東智勇公勤虜人畏之遼東人呼爲鄧鐵面三年陞左僉都御史巡撫宣府六年陞巡撫河南右副都御史值流賊作亂運謀勦平之八年陞南京刑部右侍郎改兵部未及履任奉 勅賑濟江

西事完陞都察院右都御史總制陝西三邊軍務在鎮無所建
明時哈密陝巴死子速壇拜牙郎立貪酒色不行正事屬夷哈
卽欲謀害之正德八年走入土魯番王速壇滿速兒令頭目火
者他只丁占守哈密遣使遺書甘州鎮巡官曰哈密城金印在
我與我段一萬將城與他差去使臣速打發出來不來我領軍
馬往漢人地方去璋同都御史趙鑑以土魯番書聞且言逆虜
所求不可允乞照先年差侍郎張海故事差官經略 廷擢彭
澤總督又給事中王江上言治病者藥無二君奕棋者局無二
帥不宜並用二人總制戎務俱忤旨及赴甘州會議哈密事璋
控制踈略又不據險守要虜乘隙大舉由花馬池入寇固原直

犯隴州茶毒生靈以失機閑住十四年五月起撫甘肅地方十五年陞南京戶部尚書十六年致仕卒贈太子太保

蔣昇字誠之廣西桂林府全州人成化丁未進士授南海知縣弘治十年行取擢南京福建道監察御史十七年陞汝寧知府正德三年陞湖廣副使五年陞浙江按察使七年陞浙江右布政使八年陞四川左布政使九年陞都察院右副都御史巡撫南贛汀漳等處行事簡易地方宜之十年陞南京戶部右侍郎十六年陞南京戶部尚書嘉靖二年致仕卒於家年七十七贈太子少保 賜葬祭昇天性純篤於世人機械事茫無所知及蒞政折獄物無遁情其官郡縣保民如子惟恐傷之述司臺憲

鋤奸蕪惡未嘗少有縱舍於先儒務窮理而貴果斷之說終身誦之故其言行政事無愧古人云 國史稱其歷官三十餘年操履清白始終一致家居杜門不干預郡事與弟大學士冕友愛惇睦家庭肅然臨終戒其子勿求恩澤士林重之

楊日字晉叔福建建寧府建安縣人嘉靖元年掌南院尋陞南京戶部尚書甫蒞任又改南京吏部後召爲吏部尚書未任致仕詳吏部

王纘字文哲廣東廣州府東莞縣人父恪寶慶知府纘爲人敦重寡言笑弘治癸丑進士改翰林庶吉士授兵科給事中出使安南其國王郊迎席拜以禮卓叱去之所餽金寶一無所受進

禮科右給事中奉 勅清查南畿屯田革宿弊權工科都給事
中正德初擢山西左叅政遇例裁革改雲南左叅政時逆瑾擅
權牽咎罰米五百石俸不足鬻產以償瑾誅進右布政使俄進
福建左布政使六年遂陟都察院右副都御史奉 勅巡撫應
天蘇松嘉杭等郡兼督糧儲殲逆賊劉七於狼山禦姚峒賊王
浩八於徽寧獲 賜鈔幣隨以乾清宮災警上陳言以答天譴
四事曰正大本以安天下省內臣以慰民望處驛遞以蘇民困
廣延納以開壅蔽皆切時弊 武宗欲西巡疏止之不報歲壬
申丁內艱服闋以父年老乞終養十三年 勅起撫治鄖陽至
任時聞 武宗欲巡幸諸郡供應動以萬計有求活虎豹以獻

者悉令罷之且究爲首者褻府護衛奪民產奏下辯以還民已
卯夏寧藩煽亂震擾荆襄續下令設守備人心獲安擢南京刑
部右侍郎嘉靖紀元辭前陞俸旣允隨上疏陳十事曰正心以
正大本勤政以法祖德親賢以廣延訪守信以重 詔令崇德
以禁奢侈舉知以求賢才體仁以恤民窮修禮以正風俗裁冗
員以復舊制慎刑以重人命亦多見採陞南京戶部尚書疏又
以父年老辭不允時南畿大饑續區處賑恤請內帑銀五萬給
之尋卒於官年六十有一訃聞 上命賜祭葬

顏順壽字天和湖廣岳州府巴陵縣人弘治庚戌進士授寶豐
知縣七年調淇縣十一年擢貴州道監察御史正德二年陞光

祿寺少卿三年陞大理右少卿五年陞都察院右僉都御史佐
理院事本年守制接喪十年補原職仍理院事十二年陞都察
院右副都御史仍理院事十六年陞刑部右侍郎本年轉左嘉
靖二年陞南京禮部尚書本年改南京戶部尚書三年題准急
缺南京俸糧銀兩暫於本部貯庫積餘折麥銀兩借支仍酌留
預備官吏該月折麥支用又題稱南京各衛辦料官軍每名歲
支月糧一十二石時價值銀一十二兩又有冬夏布花鈔貫不
過歲辦銀四兩經年空閒得以營運生理反得糧銀八兩肥已
况又恃頑不納連年拖欠或委官侵欺得不償失欲將前項軍
人免其辦料盡撥運糧換出在運餘丁各務生理免致冒濫月

糧將南京刑部察院贓罰銀兩每歲終煎銷約有二三千兩盡數解部以補辦料之數候年豐糧足照舊辦納上下所可行之本年改南京吏部尚書歷左都御史刑部尚書詳刑部

鄒文盛字時鳴湖廣荊州府公安縣人弘治癸丑進士授吏科給事中十二年守制十五年補原職本年陞刑科右給事中十八年陞兵科左給事中本年守制正德三年補原職本年陞戶科都給事中四年陞保定知府六年陞山西左叅政八年陞福建右布政使九年陞雲南左布政使十一年陞都察院右副都御史巡撫貴州地方十四年陞南院右副都御史兼督江防十六年陞戶部右侍郎嘉靖二年陞本部左侍郎本年陞南院右

都御史掌院事三年陞南京戶部尚書六年召任戶部尚書七年致仕卒贈太子少保諡莊簡詳戶部

王承裕字天宇陝西西安府三原縣人太宰端毅公恕子爲兒時重厚如老儒七歲能詩賦立孔子木主拜而祭之十五從莆田蕭生學遂深造二十作太極動靜圖說爲名卿傳誦成化丙午鄉舉完婚自著婚禮用中呈父執而行之弘治初端毅公爲冢宰時隨任命接海內賓客籍其所長依而用之一時號稱公明當時旣不疑其子而海內人亦無他議登弘治癸丑進士時端毅公致仕卽歸養暇授徒於弘道書院以孔顏程朱學教人正德間歷授兵刑吏三科給事中吏科都給事中以正直忠厚

名有時政先務勤政任將等疏凡三出封 郡王不受謁遣及
給賞諸邊軍士蒙實惠逆瑾用事以上書罰米三百石輸邊八
年陞太僕寺少卿奉 命點視京營馬匹人稱明決及十一年
陞本寺卿 上降旨大閱用戰馬二萬倉卒應命不缺大臣驚
異十二年陞南京太常寺卿時 武廟南巡具牲帛祭品以待
或謂上不暇弗聽及 上至奏行之言者愧服宸濠亂察其內
應者處以極刑南都蕭然本年丁憂嘉靖元年補任二年賞功
陞戶部右侍郎却其舊用公堂銀千兩貯庫言官論禮部尚書
席書賑濟事不明往勘公罪昭然卒當 上意 欽賜厝筆清
平正直四字六年陞南京戶部尚書奏鈔關商稅羨銀解京以

饒國用革私充機匠以省糧廩查累歲逋稅至一百七十萬石
又奏准江西布政司額解折糧綿布十萬疋苧布七萬疋湖廣
布政司額解折糧綿布十萬疋正德六年因布疋缺乏拖欠數
多本部題准綿布一疋折銀三錢苧布一疋折價銀二錢誠恤
民救弊之良法也近因各處分外加徵况在庫布疋又多合無
今後除南京內府每年該用布疋行令各處徵解本色該湖
廣綿布一萬疋江西苧布三萬疋徽州府苧布九千九百八十
一疋其餘照依舊例折銀仍行各撫按官戒飭各該府縣毋縱
積年收頭人等加徵害民又奏准屯田御史不能過歷比清理
軍伍事例差南道御史提督二年更替在部二年積羨銀至四

萬八千餘兩查南京諸倉應祀神祇奏准立祠以祀七年致仕卒賜葬祭諡曰康僖一時稱其濟美有范忠宣繼文正之風爲人廣額豐順鼻如截甯貌丰而澤體厚而順居嘗端嚴若神然溫平可親又栗然而不可狎也性篤孝友能悅親養志故端毅公愛之特甚又善事諸兄誨諸子姓以道有不率教則反躬自責命其愧恥雖僕御有過至內竊而敗亦薄示懲戒許其自新務以德化與人交卽之無親遠之弗踈然忠信無僞寬柔有容故與之交者無弗愛敬善接引後學因材以篤又廣擇髦士俾各敦學以訓蒙士候厥有獲則授所未聞故師逸功倍學而成立者衆教人以禮爲先兄弟子家有冠婚喪祭之事必命

率禮而行又刊布藍田呂氏鄉約鄉儀諸書俾鄉人由之又表
章先哲如毛氏逮忠李衛公靖以文武濟時楊元帥于江樹勲
於國邑令朱春夫婦死節或立祠致祭或撰記署扁建碑皆顯
其忠義激勸後學所著有論語蒙讀談經漫語星軹集辛卯集
政經堂集庚寅集諫垣奏草草堂語錄三泉堂漫錄李衛公通
纂厚鄉錄橫渠遺書太師端毅公遺事童吟稿婚禮用中進修
筆錄動靜圖說共若干卷

邊貢字廷實山東濟南府歷城縣人生有異質卽襁抱時祖母
王夫人時置膝上口授章句一過輒成誦旣乃從大父治中公
於官所於總角卽蔚有文名弘治乙卯年纔二十舉山東鄉試

第四人明年丙辰遂登進士第授太常寺博士時 敬皇帝重
祀事駿奔惟謹嘗以告不與 上私語左右曰何不見年少官
人耶其爲 上所簡注如此乙丑六月擢兵科給事中性峻直
又練習國章通曉時務抵掌談天下事率鑿鑿副名實雖重逆
權貴弗畏避 敬皇帝登遐劾太監張瑜與太醫劉太高廷用
藥之誤又劾太監苗達與國公朱暉都御史史琳用兵之失詞
意剴切聞者凜然是年九月仍擢太常寺丞旣而逆瑾擅權凌
轅衣冠亡所不至又不能善事顯貴人於是顯貴人伺瑾顏色
出爲衛輝知府庚午改知荊州事時監鄂寇亟飛輓之務以身
任之民不擾而事集克獲之功與勞居多若夫革吏奸察民隱

修廢墜宣恩惠爲天下治行最辛未擢山西提學副使尋丁父
代州公憂甲戌服除河南提學正己以格物先行而後文申條
教以定其趨勤考校以成其業復文體以示其標嚴勸懲以鼓
其氣由是士經訓迪者莫不充然各有所得丙子鄉試號稱得
人丁丑丁母董夫人憂初貢體豐顏渥風神藻雅兩更三年喪
哀毀踰禮自是積衰成疾亦倦於游辛巳世廟入繼大統詔
求遺逸撫按諸公文章論薦乃卽家起爲南京太常寺少卿嘉
靖癸未晉南京太僕寺卿承平日久騎政漸廢至則釐弊課功
公私稱善甲申改南京太常寺卿丁亥再改太常寺卿提督四
夷館時四夷文字體各地殊八館諸生學亡師授乃徵求故譯

是正諸文以成一家之學以通遠人之情戊子以年勞轉南京
刑部右侍郎己丑擢南京戶部尚書東南財賦半輸留都百官
六軍咸仰給焉 制以都御史總之轉相疑忌事多格闕貢曰
會計者部之事也覺察者院之事也何妨焉其識大體事多類
此十年條陳事宜一省免公私虧費一浙江戶口鈔銀一改折
庫收絹疋一改收鳳陽麥價至議將南京御馬監每年會派稻
草六萬包改派各衛倉場上納以備騎操馬匹支用公私稱便
又上疏國計一處京操以絕盜支之弊一處屯糧以絕抵扣之
弊并議處長單以便填繳皆切時弊辛卯忽以疾懇疏乞歸初
貢癖於求書所蓄不啻數萬卷壬辰偶遭回祿焚之幾盡仰天

大哭曰嗟乎甚於喪我也疾遂篤卒年五十七

尚書李廷相云國朝文章無慮三變 高皇帝初正大統青田

金華義烏諸君子力以斯文爲己任剗削舊習橫制頽波幅尺
騷雅興起學士永樂以後騷卿藻士布滿天下然詞頗纖弱稍
異曩昔識者病焉 敬皇帝時明興百三十餘年於茲矣四海

梁肉百官委蛇得以肆力弘學游心藝苑於是公起歷下與北
地李夢陽河南何景明互相師友力追古作妙悟真機鼓吹盛
美可不謂振世雄豪也邪况公孝友天至又喜賓客樂道人善
接引後進當若不及至於當官蒞法必盡其力所在人皆嚮之
愛之語曰文質彬彬然後君子其在斯乎其在斯乎

秦金字國聲直隸常州府無錫縣人自童時卽穎秀不羣見羣
兒戲每卻避之端默自若父早牧公授之啓蒙諸書退爲家人
解卽能了其大義一日早牧公對客以陸續命課金援筆立就
其詞曰公紀因心孝懷相奉母慈拜時曾墮地袁術大奇之滿
座驚歎謂爲神授至今傳之稍長經學蹊徑豁然大通爲文日
有繩尺丁母王夫人憂毀瘠如禮自爲之立傳歲丙午年二十
由儒士起選自郡邑以至督學御史三試皆第一是歲領南畿
鄉試早牧公欲大成之不遣會試亟令就西塾讀書如故越以
治癸丑中進士故相徐文靖公溥在位召試館職命以父老急
歸省不就徐愈器重之嘗謂人曰釋褐新進能知忠孝大節不

有秦氏子卯乙卯授戶部福建司主事委督太倉糧儲明年臨
臨清倉勘順天等府災歉監收長安四門倉及象房糧芻剔抉
姦蠹撫綏悍娶職盡而舉大司徒太原周經簡視諸司章奏事
有盤錯多所裁決尋陞河南司署員外郎再進山西司署郎中
時邊書告警軍食不贍乃起本司郎中計處糧餉條陳時宜曲
中緩急癸亥丁父憂正德改元服闋復除戶部四川司郎中時
戚畹恣驕中當擅權奏討引鹽連袂以攘金持之不可大司徒
洪洞韓文執奏至再其風稍寢革絲是術者怨金嗾邏事者橫
撫之竟無所得戊辰禮部以會試同考官請金以族人多入試
辭不赴是歲陞河南按察司副使提督學校以身範士嚴立課

程哲於品藻凡所甄拔率多嚮用庚午陞左叅政分守大梁道
時劇賊劉六劉七等嘯聚亡命長驅河洛將薄封丘金先期設
備繕城壘時禩禳會叅將宋振提兵南下馳檄邀之翼以民兵
鼓戰遇賊於陳橋剽却村大奮擊之斬賊首若干級生擒其魁
封丘晏然土人生爲立祠是歲陞山東右布政使癸酉轉左重
念民遭賊刃極意拊循凡勢要請託翔價賣抄等蠹民數事卽
日禁除甲戌陞都察院右副都御史巡撫湖廣地方贊理軍務
不携妻子所至問疾苦誅姦貪威譽遠流 奏上便宜八事繼
上十事皆艱危切務巨盜盡誅四面蜂起乃擒負辜家琪於江
討猺獠於彬峯靖叛苗於香爐峰其功最著己卯逆濠告變

大駕親征中官李鎮附麗彬賊橫肆誅求抗辭直奏請以一身當
之民免於毒庚辰陞戶部右侍郎辛巳改吏部尋改戶部左侍
郎時大司徒未至攝部事清理勲戚莊田禁革勢要鹽引創籍
勾稽兩直隸十三省逋負國用漸充先是彬桂功成陞俸一級
廕一子爲錦衣衛世襲百戶金疏辭免至 世宗嗣登大位錄
舊勞 賜之白金綵幣仍晉俸級如初癸未陞南京禮部尚書
尋改南京兵部尚書恭贊徵務是冬改戶部尚書因條奏處將
政以備國儲凡數事琅與千餘言一言一舉皆治世公忠丁亥
乞身歸田 上賜璽書寶鈔乘舟以歸仍命有司歲給與銀月
給廩有差辛卯復起南京戶部尚書奏准南京內官各衙門福

稻草每包折銀二分四釐南京戶部定場草每包折銀一分八釐俱解本部銀庫收貯出給通關回銷其額派草包行令舖戶按季上納完日赴部領價又折絨以防積朽折綿價以順人情公私俱便十一年召改工部尚書詳南京兵部

許誥字廷綸號函谷河南河南府靈寶縣人弘治己未舉進士擢戶科給事中正德元年改翰林院檢討皆慷慨明直遇事斤斤斷決讜言富學聞於一時四年父太宰襄毅公進持正忤闕權歸誥謫全州判官五年奔襄毅公喪回靈寶終喪遂不仕十二年起尚寶司丞又棄之歸益研磨聖經盡洗相沿之臆言一曰宋人理氣之分大謬蓋由不明夫孟子性善之訓然也善者

性之實語性之善如品玉之溫玉有等如性亦各賦宋人若謂善蘊性中而自氣始有不善又移之造化支蔓無以詰之矣二曰聖人以用世傳心法謂天地之德曰生人受天地之德曰仁故善愛身者無膚不養善爲仁者無物不體三曰聖人之教務學也在動弗曰靜謂舜命夔四言和以四樂臯陶述九德箕子衍五事孔門益以九容九思舍是而辭以夷之僻山之畸士之警言可乎哉自宋及元羣和協議牢不可破密無從隙詰超然有悟由是補通鑑正圖書原性學序道統申原道叅易理詩言遵聖軌辨決宿誤投之合乎自然揭之當乎人心會嘉靖四十年羣臣薦之起南銀臺右叅議六年陞翰林侍講學士八年陞太

常卿掌國子祭酒事 今上初登天位文華左室列三教之誦
卽命撤爨膳至是用其議正祀者 皇帝王八師也南向
者周孔二師也東西對向釋菜之辰惟輔臣及誥等九人相事
乃上章講中和 上說曰以已情通天下至治哉又言孔孟全
教治情蓋性靜情動靜無所施功而動可致欲也十年晉吏部
右侍郎本年拜南京戶部尚書公潔操貳吏選恤浮費裕戶財
十二年卒於官享年六十四贈太子太保謚莊敏

國琛集云誥究心玄微求明性命之說乃泛涉經傳躋撥雋腴
直欲與古人定異同之案其得悟莫得而知要亦注情者歟

國朝列卿紀卷之三十四終